

አስመራ፡ ህድግ ርኢስ ኢሳይያስ ወርኢስ ሶማልያ

ርኢስ ኢሳይያስ ወፍወርቂ ወርኢስ ፈደረላይት ጀምሁርየት ሶማል ሐሰን ሼኽ ማሕሙድ ፡ ማሌ 13 ማርች አምሱይ ዲብ ዕላቀት ክልኤ ለጀህት ወናይ ሕብር አህምሮት ዲብ ቀድያት መንጠቀት ለረከዘ ህድግ ወደው።

ዲብ ቃዕት ሃገር ዲብ ወደው ህድግ፡ ክልኤቶም ለሚርሐት እብ ፍንቲት ዲብ ሓለት ጀወ ሶማል ወቀድያት መንጠቀት እተ ወደው ህድግ ፋይሕ፡ ቀድያት ሶማል እምበል መትኢታይ ካርጅ እብ ሶማልዩን ሐል ለትረከብ

እቡ አግቡይ እግል ልትባሰር ለሒስ ክምቱ ትፋህመው።

ርኢስ ሐሰን ለዝያረት ወህደፈ እብ ከሰስ እግል ኤሪን እተ ሀበየ ሐብሬ፡ ለዝያረት ክፋል ናይለ እብ ትሉሉይ ለትጉበእ ጎማት ክምተ እንዲ ሐበረ፡ ምስል ርኢስ ኢሳይያስ እብ ሰበት ሓድረት ዕላቀት ወናይለ መጽእ ወክድ በራምጃት ክልኤ ሐዋት ድወል፡ ተጠውራት ቀድያት ጀወ ሶማል፡ ፍገራት ሰዓይት ኤሪትርየ እግል ሶማል፡ ወእብ ዓመት ዲብ ምህም ናይ መንጠቀት ጋራት ክም ህደገው ሸርሐ።


እብ ዐዙመት ርኢስ ኢሳይያስ አፍወርቂ ዲብ ኤሪትርየ ናይ ክልኤ አምዕል ዝያረት ሸቅል እግል ሊዲ ማሌ 13 ማርች አስመራ ለአተ ርኢስ ሐሰን ሼኽ ማሕሙድ ዮም ሳዕት 9:00 ቀደም አዝህር ትሳርሐ።

ርኢስ ኢሳይያስ አፈወርቂ ህዬ ዲብ እድንያይ መከረዩ ጥያራት አሰምረ እብ አሴራር ሕሸመት ሳርሐዩ።

እት ናይ ሰርሐ ዓደት ወዘር ካርጃየት አሰይድ ዑስማን ሳልሕ ሓድር ዐለ።



አስመራ፡ ህድግ ርኢስ ኢሳይያስ ምስል ርኢስ መጅልስ ሰያዲ ሱዳን



ርኢስ ኢሳይያስ አፍወርቂ ናይብ ርኢስ መጅልስ ሰያዲ ሱዳን ጀነራል መሐመድ ሐምዳን ደግሎ እንዲ ትከብተ ምስሉ ህድገ።

ርኢስ ኢሳይያስ አፍወርቂ ማሌ ለህ ቀደም አዝህር ናይብ ርኢስ መጅልስ ሰያዲ ሱዳን ጀነራል መሐመድ ሐምዳን ደግሎ (ሕሜቲ)፡ ዲብ ቃዕት ሃገር እንዲ ትከብተዩ ምስሉ ህድገ።

እተ ዲብ ዕላቀት ኤሪትርየ ወሱዳን ወናይ መንጠቀት ቀድያት ለረከዘ ህድግ፡ ርኢስ ኢሳይያስ፡ ዲብ ሱዳን ለህለ ቴለል አትባዶእ እደይ በዝሕ እቱ እብለ ትፈናተ ዓማት አክባር ትጀርመት ብዕደት ትትህየቡ ሰበት ህሌት።

ሓለት ሱዳን እብ ሱዳንዩን ሌጠ ሐል እግል ትርኩብ ኤሪትርየ ለባቱ መብዓእ ሳብት አክደ።

ርኢስ ኢሳይያስ እብ ተውሳክ፡ ዲሸ ሱዳን ሰያደቱ እንዲ ተሐፈዘት ምን ቀድያት ሰያሰት ብዕድ ሐር እንዲ ገብእ ዶሩ እጃቢ እግል ልቀድም ኤሪትርየ ክም ትደምን ሸርሐ።

ጀነራል መሐመድ ሐምዳን ደግሎ እብ ጀህቱ፡ ዲብ እት ተአሲስ ዶር ዐቢ ለቀደመት መዝመት ኢጋድ እብ ሐዲስ አቅብሎተ አሰናይ ሐቐለ ቤሉ፡ ዲብ መጽእ ወክድ ቅሩብ ናይ አንፋር ድወል እጅትማዕ ውዘራእ ካርጃየት እግል ልግባእ ክምቱ ሐበረ።

እትሊ ወክድ እሊ ሱዳን ራኣሰት ኢጋድ ዳብጠት ክም ህሌት ልትአመር።

እተ ህድግ፡ ወዘር ካርጃየት አሰይድ ዑስማን ሳልሕ ወሰፍሪ ኤሪትርየ ዲብ ሱዳን አሰይድ ዒሰ አሕመድ ዒሰ ሓድራም ዐለው።

ናይብ ርኢስ መጅልስ ሰያዲ ሱዳን ጀነራል መሐመድ ሐምዳን ደግሎ (ሕሜቲ)፡ እብ ዐዙመት ርኢስኢሳይያስ አፍወርቂ ናይ ሐቱ አምዕል ዝያረት ሸቅል ሊዲ ምን ገጽ ፈጅር አሰመረ ዲብ አተ እቱ ወክድ፡ ወዘር ካርጃየት አሰይድ ዑስማን ሳልሕ ዲብ እድንያይ መከረዩ ጥያራት አሰመረ ትከብተዩ።

ፈሮ፡ አትናያት ደረሰ ፋዳብያት ገብእ

እት ምዴርየት ፈሮ፡ ዲብ እምትሓን ሸሃደት 8ይ ፈሰል ንቃዋ ውቁል እግል አንሳት ጀዋእስ ተህየቦዩ።

መስኡል መክተብ ማሕበር ወጠን ሸባብ ወደረሰ ኤሪትርየ እተ ምዴርየት ሻብ ዑስማን አሐመዲን ዲብ ቀደመየ ከሊመት፡ አትናያት መሰል ሰኔት ላተን ደረሰ መን አውልውየት በራምጃቶም ክምቱ እንዲ ሐበረ፡ አንሳት እብ ክሉ ብቅዓት እግል ልግብእ ዲብ ገብእ ጅህድ፡ ምስል ሰብሸርከት እብ ከድም ክም ህለ ሸርሐ።

መስኡል መዳርስ ዲብ ምዴርየት እስታዝ እስማዒል ዐሊ እብ ጀህቱ፡ ወራት ደረሰ ወአደረሶት እግል ትደቀብ እብ

ዓመት፡ መሻረከት አንሳት ደረሰ እግል ትዕቤ ህዬ እብ ፍንቲት ዶሮ ለቀደመው ሰብሸርከት ሸቅል ሐመደው።

በቃዕት ወመሻረከት ደረሰ እግል ትትወቀል ለገብእ ጅህድ እግል ሐቱ ጅህት ሌጠ ለተርፍ ዳይ ክም ኢኮን ለሸርሐ እስታዝ እስማዒል፡ ፈሀም ወዶር መጅተማዕ እግል ልትወቀል እብ ሕበር እግል ልትከደም አትፋቀደ።

ለጀዋእዝ ለነስአየ እብ ጀህተን ለገብእ እግሉን አትናያትዲብ በቃዕተን ዶር ክም ቡ እንዲ ሐበረዩ፡ ተእሂል ምህናት ለፊይሕ እብ አርድየት እግል ተህሌ፡ ወናዲ አክትብት እግል ልፍየሕ ለልብል ረአይ ቀደመየ።

ብሪጣንያ፡ 8 ማርች ተዐየደት

ኤሪትርየን ሱኮን ብሪጣንያ ወአየርላንድ፡ እተክምስልሁመ እስራኤል ወፈረንሰ፡ ኤሪትርያይት ትጋብ ወተአደምዕ ወትሸቂ ወተአለምዕ” እብ ትብል ስቅራት መሻረከት ወዶር ኤሪትርያት አንሳት ዲብ መዳፍዕት ወዐማር ለትሸርሕ ስቅራት፡ 8 ማርች እድንያይት አምዕል አንሳት እብ ነያረት ዐየደው።

እት ብሪጣንያ ወአየርላንድ ፡ ለዒድ እብ ደረጀት አቅሳም መዳይን ለንደን፡ ማንቼሰተር፡ በርሚንግሃም፡ ኖቲንግሃም፡ ሊድሱ፡ ሸፊልድ፡ ኮባንትራ፡ ሌስተር፡ ሊቨርፑል ወዳብሊን ዲብ ዮም 4 ወ11 ማርች ገብአት።

ዲብ መዲነት ለንደን ዲብ ገብእ፡ ሰፊር ኤሪትርየ ዲብ ብሪጣንያ ወአየርላንድ አሰይድ እስቲፋኖስ ሃብተማርያም ለሻረከ እቱ በራምጅ፡ መስኡል ቀድያት ሸዑብ ወጃልያት አሰይድ ተወልዲ ዮውሃንስ ዲብ ቀደመየ ከሊመት፡ ናይ እለ ሰነት 8

ማርች ዲብ መርሐለት ተቅዩር ፍንቲት ትትዐየድ ክም ህሌት እንዲ ሸርሐ፡ ዲብ ትታኬን ለህለ ናይ ዐማር ውበነ መርሐለት፡ ዶር ሚርሓይ አንሳት እብ ዓመት ዲብ ካርጅ ለህለየ ህየ እብ ፍንቲት ምህም ክም ቱ አብርሀ።

ርኢስት ማሕበር ወጠን አዋልድ አንሳት ፈርዕ ብሪጣንያ አሰይደ ኤልሰ አብርሃ እብ ጀህተ፡ መርሐለት ለትጠልቡ እግል ለአትትመ፡ ክሉ አቅሳም ወመትነዝመ፡ እንዲ አተረደ እግል ልክደመ አትፋቀደት።

እተ መናሰበት፡ ከሊመት ተአቅዩድ ለአሰምዐው መስኡሊን መትነዝም ህዬ መሻረከት ወዶር ኤሪትርያት አንሳት ዲብ ብሪጣንያ ወአየርላንድ ዲብ ናይ ጃልየት ወወጠን በራምጃት እግል ልዕቤ ምኖም ለልጠላብ መዓወነት ከም ወዱ አክደው።

ኤሪትርየን ሱኮን እስራኤል እብ ጀህቶም፡ ዲብ ወደው እብ

ናይ ዓዳት ወፈን ወራታት ለትተለ በራምጅ፡ ክሊመት ማሕበር ወሰፋረት ትቀደመት።

መስኡል ሸኡን ተንፊዝየት ሰፋረት ኤሪትርየ ዲብ እስራኤል አሰይድ ሰለመኅ ክንፌ እተ አሰምዐየ ከሊመት፡ ለለአደምዕ ዶር ወመሻረከት ኤሪትርያት አንሳት ዲብ ሐልፈ ናይ ግድለ መራሕል እንዲ ዘክረ፡ ብይኢት ለህሌት መርሐለትመ መሻረከትን ወፈዛዐተን እግል ቲዚድ ክም ለአትሐዘኔ አፍህመ።

ሕድ እብ ሸብህ፡ ዲብ ፓሪስ - ፈረንሰ ዲብ ገብእ ዒድ፡ ርኢስት ፈርዕ ማሕበር ወጠን አዋልድ አንሳት ኤሪትርየ አሰይደ ዮርዳኖስ ተክሌ ወመስኡል ሸኡን ተፈዝየት ሰፋረት ኤሪትርየ ዲብ ፈረንሰ አሰይድ በረኽት ጳውሎስ ለአምዐል ወተርጀመት ለሸርሕ ወግድለ አንሳት ኤሪትርየ ለሊሐመድ ከሊማት አሰምዐው።



ርኢሰ ኢሳይያስ፡ አስክ ርኢሰ ቻይነ - ሺ ጂን ፒንግ ልእከት አሰናይ ነድእ

ርኢሰ ኢሳይያስ አፈወርቂ፡ ርኢሰ ጅምሁርየት ቻይነ - ሺ ጂን ፒንግ እብ ሶት-ታመት ናይ ወጠንያይ ምጅልስ ሽዑብ እግል ሳልስ መረት ሰበት ተሐረ፡ ልእከት አሰናይ ነድእ።


ዲብለ እብ ሰሚት ሽዑብ ወሕኩመት ቻይነ ለነድአየ ልእከት፡ ርኢሰ ኢሳይያስ፡ “እግል ሳልስ መረት ርኢሰ እንዴ ገብአከ መትሐራይኩ፡ ተአምርተ እማነት ወኩብቴ ናይለ ሕኩመት ቻይነ እብ ሚርሒትከ እትለ ሐልፈ. ሰኖታት ለረክቡቴ ክሉ ለጀዋንቡ ተጠውር፡ ክምሰልሁመ ዲብለ መጽእ ለተአርእዩ መትቀዳም ሻፍግ ቱ።” ቤለ።

ርኢሰ ኢሳይያስ እንዴ አትለ፡ ዲብ እለ ሰእየት ለተሀይብ መርሐለት፡ ቅዱይ ውብዝሒ ለቡ እድንያይ ተርቲብ እግል ለሀሌ እተ ገብእ ጅህድ፡ እብ ርኢሰ ሺ ጂን ፒንግ ለትመረሕ ሕኩመት ግዴት ዐባይ ክም ተሀሌ እለ ደማነቱ ሸርሐ።

ምስንዮት ኤረትርየ ወቻይነ ዝያድ እግል ትተረድ ጅህድ ክም ገብእመ አከደ።

ርኢሰ ሺ ጂን ፒንግ፡ ሰልፍ እት ሰነት 2013፡ ካልእ መረት እት ሰነት 2018፡ አዜ እት 2023 ህዩ እግል ሳልስ መረት ሕሩይ ህለ።

እምትሓን ሽሃደት ካልኣይት ደረጀት አንበተ



እምትሓን ሽሃደት 2ይት ደረጀት ማሌ ለሀ 13 ማርስ ዲብ ክለ ወጠን ወዲብ ርያድ ወጅደ ሰዑድየ እብ ዓመት ዲብ 10 መራክዝ እግል ልትህየብ አንበተ።

እትሊ አስክ 18 ማርስ ለለአተላሌ ዲብ 12 መጃሳት ለልትህየብ እምትሓን ወጠን፡ 49.1 ምእታይት አንሳት ለብእቶም 14,395 ደረሳይ ሻርቲ ህለው።

ናይ ዮም ዓመት መሻርርከት 98 ምእታይት እብ ገበይ ንዝምት ዲብ ሳወ ወመዳርስ ፈንዮት ደርሶ ለሓገው ቶም።

እምበል እለ፡ እብ በራምጅ ምህሮ እግል ዐባዩ 12 ፊስል ለአተመመየ 139 አንሳት ወእብ ሐዲስ ለለአምተሕኖ 213 ደረሳይ ክም ህለው፡ ምን መርከዝ እምትሓናት ወጊማም ለትረክበት ሐብሬ

ተአፍህም።
መዲረትለ መርከዝ ዶክቶረት ብሰራት ገብሩ ቀደም እግል ኤሪነ እተ ሀበተ ሐብሬ፡ እምትሓን ሽሃደት ካልኣይት ደረጀት፡ ደረሰ ምነ ዐለው እተ ደረጀት ዲብ ትወቀለት ደረጀት ለለዐዴ ሰበት ቱ፡ ለሀለ መምርሕ እብ ዋጅብ እንዴ ተበዐው ወእንዴ ኢልትረበሾ እብ እንትባህ እግል ልሸቀው ከም ትፋኔት ልትፈቀድ።

ቅብለት በሐር ቀየሕ፡ እግል ምስኩናም ሰልፈት ትትህየብ

ማሕበር ምስኩናም ሐርብ ምሕርበት ኤረትርየ፡ ‘ኢ. ፒ. ኤል. ኤፍ - ህግደፍ ሺዥን ሩም’ እበ ልትበህል ሐሸም ፓልቶክ ለትከምከመው ኤረትርየን እበ ወደወ ሰዳይት ማል፡ ዲብ አቅሊም ቅብለት በሐር ቀየሕ እግል ህለው 39 አንፋሩ 825 አልፍ ነቅፈ ሰልፈት ሀበ።

ምን እለ ለ560 አልፍ ነቅፈ ዲብ ምደርየት አፍዐበት እግል

ህለው ሰለስ አንሳት ለብእቶም 27 ምስኩናም ለትካፈለ ዲብ ገብእ፡ 225 አፍል ነቅፈ ዲብ እምህሚሜ- ምዴርየት ቅሮረ እግል ህለው አንፋሩ፡ 40 አልፍ ህዩ ዲብ ምዴርየት ግንዳዕ እግል ለህለው ክልኦት አንፋር ትህየበ።

እተ ማሕበር መስኡል አትሐደሮት ወአትመቃርሖት አሰይድ አብርሃም ክፍለጽዮን፡ ለሰልፈት፡ ዲብ ሐርሱ፡ ተዋብ

ንዋይ ወትጀረት እንዴ ሸቀው ርሖም እግል ልቅደሮ ለአመመት ክምተ ሸርሐ።

ሐሸም ፓልቶክ ‘ኢ.ፒ.ኤል. ኤፍ። - ህግደፍ ሺዥን ሩም’ እበ ለትበረዐዩ ማል፡ ቀደም

እሳመ ዲብ አቅሊም ጋሽ-በርክ እግል ህለው ምስኩናም ሐርብ ምሕርበት 2.6 ሚልዮን ነቅፈ ሰልፈት ህይብት ክም ዐለት እንዴ ሸርሐ፡ እብ ስም ማሕበር ሐምዴ ቀደመ።

መዲር ምዴርየት አፍዐበት

አሰይድ አሕመድ መሐመድኖር ረጀብ እብ ጀህቱ፡ አንፋር ማሕበር እብ ሰልፈት ለረከቡ ማል፡ ሓለት ዓፍዮቶም ዲብ ሕሳብ እንዴ አቴት ፍገራት ዲብ ለሀይብ ለትደረሰ ሸቅል እግል ልክስእው አትፋቀደ።

ባጼዕ፡ ተእሂል እግል ሽባብ ገብእ

ዲብ መዲነት ባጼዕ፡ እግል መደት ስስ ወሬሕ እብ ገበይ ክታበት ድራመ፡ ገበይ ሰየሖት ወተምሲል፡ ክምሰልሁመ እብ አምር ክቱብ ተእሂል ለነስአው 26 ሽባብ እት ዮም 6 ማርስ ትደሐረው።

መስኡል ቅስም መሸሮፍ መሕበር ወጠን ሽባብ ወደረሰ ኤርትርየ አቅሊም ቅብለት በሐር ቀየሕ ሻብ ሰዲድ ሐጂ አቡበከር እትለ ቀደመዩ ተቅሪር፡ ለተእሂል፡ ክፋል ናይለ መቅደረት ሽባብ እንዴ ተአመረ እግል ጠወሮቱ ለገብእ ጅ ህድ ክምቱ ሐቆለ ሐበራ፡ ለተእሂል ለነስአው፡ ለረክበዉ አምር እብ ፍዕል እግል ልሸቀውእቡ ትፋኑ።

መስኡል ተንዚም ሲያሰት ሻብ ተኻሌ ዘርኤ ህዩ፡ እትለ ሰነት ጎና ወቀደሚህ ለተህየበ ተእሂል ምህነት ምስል መሕበር ወጠን አዋልድ አንሳትኤርትርየ ወመሕበር ኮንፈደራልየት ሸቃለ ኤርትርየ እብ መትዐዋን ክም ዐለ ሐቆለ ሐበራ፡ ለተእሂል ለነዝመ ቅስም ምህሮ እግል ዐባዩ ወወሳእል ሐብሬ ውዛረት ተዕሊም ሐመደ።

እምበል እለ መሕበር ወጠን ሽባብ ምዴርየት ባጼዕ ለነዝመዩ፡ ጅግራታት ርያደት ወበራምጅ ዕፌ ፈን ለከምከመ

ሳምን ሽባብ ደረሰ፡ ሐክመት አቅሊም ቅብለት በሐር ቀየሕ አሰይደ አሰመረት አብርህ ወመስኡል መሕበር ወጠን ሽባብ ወደረሰ ኤርትርየ እሰይድ ሳሌሕ አሕመዲን ዲብለ ሐድረው ዲቡ ተመ።

እብ ጀህት ብዕደት፡ ዲብ ባጼዕ እብ ፈሬዕ ንኡሽ መሕበር ወጠን ሽባብ ወደረሰ ኤርትርየ ሸሪከት አስምንቲ ገደም ለትነዝመ ወእግል መደት 10 አምዕል ለአተለለ ዝያድ 200 ሽባብ ልአሻረከ ሰሚናራት፡ ጅግራታት ፈን ወማዕሉማት ዓመ፡ ክምሰልሁመ ወራታት ዐዳት ወርያደት ለከምከ ሳምን ሽባብ ገብእ።

መመቅርሐይ ሸቅል ሸሪከት አስመንቲ ገደም አሰይድ ወልዳይ ኪዳኔ እትለ አስመዐየ ክለሙት፡ ዲብለ መጽእ ምንለ ትቀደመ በራምጅ ለልትደቀብ እግል ልትዳሌ እብ ሕሰር እግል ልትሸቂ ዲቡ ሐቆለ ትፋኑ፡ ለሸሪከት ሰዳይተ እግል ተአውሬ ዱሊት ክምተ አከደት።

ዲብለ መናሰበት፡ ሰብ ምህነት ሳቶም ሽባብ ሸቃሉ፡ አግቡይ ወራታት ተዕሊም አስምንቲ፡ አትአመሮት ምስል ማሸናት ሸሪከት አስምንቲ ገደም፡ ክምሰልሁመ እብ ክሰብ ደሐን ዲብ ኣነን ሸቅል ለከሰስ ክቱብ ሕፍዝ ቀደመው።

7^ይ ክፈል

ድግም ሐሽል ወከራይ ምስል ወድ ሚን ኣደሚ

“ሓይሰ መልክ ሙሉክ በዐል ኣነን ዐባይ፡ ኔሰሓይ ወሚክራይ፡ ዐንደል ሶመ እግል ኣባይ፡ በዐል ሰኔት ወትቅር እግል ፈታይ፡ ርዕያይ እግል ገቢሉ፡ ገለድ ባይኢ እግል በዐልኻም ወጹዋሁ እብ ሸንሂት ወሕላይ፡ ምስልካቱ ለባበት ምዋኑ ወለጌማቱ፡ ሄይባይ እንተ ወመገንድላይ!!”

‘ዲብ ወቅት ሰኒ ቅዱምቱ ልትበሀል። ወድ ሐሽል ወከራይ እብ ምልህዮት እንዴ ታለዉ ምስል ነብሮ ዐለው ልትበሀል። እተ ለእቱ ሳክናም ለዐለው ክዋነ ወድ ሐሽል ከይነት ወቀሽ እንዴ ኣገመ ምኑ፡ እብ ኣማነት ወነሳሐት ምስል ከራይ እት ነብር፡ ከራይ ላቱ ሓለቱ ወጽንዔሁ እት ረኣሰ ወድ ሐሽል እግል ለኣርኡ፡ እብ ዐቅል ወኣምር እንዴ ኢልትመቅርሐ እብ ድራክ ወቅብብ ገንሐ ዐለ።

ወድ ሐሽልመ እግል ከይነቱ ወለ ኣከይለ ውዳዩ ኣምሩ ሰበት ዐለ እግል ልንስሐ ወገበይ ለሐብሩ እብ ኣምሳል ወኔገርት እግል ለሐብሩ ጀረበ።

ከሐቱ ኣምዕል እብ ክእነ ትባለሰ ምስሉ፡ “ወላሂ እሊ ኣነ ምን ህለ ክምሰሌይ ወእግለ ትሐት እብ ከልቀቱ እድነት ለዐለ ሰጋድክ ረኣሱ ለዐል ማጠጦት ወእግለ ምትሐትክ ህለ ዳረኹት ይሓደካሁ ምንዲ ገብእ ምንክ ለኣኬ እግል ልትሰለጥ እትነቱ። ወድ ሚን ኣደሚ ኣብሳራቱ ብዙሕ ቱ ወኣልባቡመ ኢልትዐሬ። ገዚፍ ቀትል ወእት ረኣሰ ጃእር ለኣጅእር። ብለቅ ፈንቅል ወዐድ ሓድር ለኣግዕዝ። ፌ’ረት ምን ሰመ ከሬ፡ ወዓሰታት ምን ቅርድ ኣብሐር ለኣፈግር። ኣድብር ፈግር ወጭዊት ለሐልፍ፡ ምን ኣክልይ ህለ ለልብል እግሉ ለኣጀግሐ። ከኣነ ክምሰል መልሀይ ወበዐል ሰኔት እነሰሐክ ወእመክረኩ መትደጋግ ለኣትሐዘኩ ድራርክ እግል ጸርክ እግል ኢትሕደገ” ቢለዩ።

ከራይመ ለኣተንሰዩ እንዴ ዐሉ፡ እብ ክእነ በልሰ እቱ፡ “ደሐንቱ ሳምዕክ ህሌኩ። ለእተ ኢክሰሱ ለሀድገ ለእግለ ኢፈቱ ለኣተንሰ” ልትበሀል። “ሳምዐ እበ እንተ ትገብእ!? ሐቆለ ቢለዩ፡ እንዴ ኣተንከበ እበ ረሓበ እዴሁ ጽፍዐት ሐቱ እበ ደውረራዩ። ወድ ሐሽል ምን እቱ ክሩይ ለዐለ ቀፈላት ክምሰል ቀንጸ “ሐሰብክ ወዐይብክ እዘም ምንዬ ሳምሐኒ ወሐቱ ኢቲበለኒ” ቢለዩ። ከራይ፡ ሐቆ ሰኒ ምን ልቡ ትሰሐቀ፡ እለ ናይክ ምብላስ ሚ ልትበሀል መስለክ!? ለእበ ኢትሰኣለውክ እተ ኢትብለሰ ወኢትህደግ። ለእግለ ኢትረዴ

ኣልፍ ለሊ ወለሊ



እግል ኢትሰመዕ ወኢትርኤ” ቢለ ከሐንገሉ ነጋነገ።

ወድ ሐሽልመ (ነሰሐትክ እግል ሰብ ሸር ኢተስመዕ፡ እብ ሸር እብሸር ኢልበዱለ እግልኩ። ምን በዐል እኪት ሰኔት ኢትጸበር እምበል እኪት ለእት ልቡ መስከበ ወዴማተ” ቢለ ከእት ልትጠራፊ ትሸነክ ምኑ።

ከራይመ መባልሰ ወድ ሐሽል ለኣተንሰ ሐቆለ ጸንሐ፡ እብ ደሚሩ እግል እኪቱ ሐሰበ ወነው።

ወድ ሐሽል፡ ላኪን ክእኒ ቢለ እብ ደሚሩ፡ “ለትከበረ ከሰረ፡ ፡ ወለ ኣፍተረ ጀግሐ። ለቀወ ትዐሴ፡ ወለፈርሀ ሰልመ። ወለ ኣተንሰ ልብ ከረ። ምብላስ ኣማን ህይ ሰፊት ሸረፍተ ወሐጠር” እት ልብል እግለ እብ ሰበቱ ትጸፍዐ ንሳሉ፡ እብ ከፎ ክምሰል በልሰ እግል ሓራቱ ሐሰበ። እንዴ ኣትለ ህይ መባልሱ እግል ለኣሰኒ ምስለ እግሉ ቱሉይ ለዐለ ከራይ እት ፈክር መባልሰ ዓቅላም ወላባም ሐዘ ወዘክረቱ ፈተሸ። ክእኒ ህይ መባልሶም እት ዐቅሉ ዔረ እግሉ። “ለገብር እት ሐቆ ረቢሁ ለኣዘንብ ወከጤ፡ ደኣም ረቢ ዐፎ ፈቱ እግለ ልትረጀዩ ገብሩ ለሐምቅ፡ ከሳምሐ ወዐፎ ገብኣ ልብሉ። ኣነ ህይ እግልክ ገብርክ ሐምቅ ኣኑ፡ ላመ እግለ ዘበዋከኒ ጽፍዐት፡ ክምሰል እግለ ርኤከኒ እት ቀፈላት ካራተኒ። እግል ሐርማዝመ ዛብጠ ምንዲ ትዐሌ ኣላሁ ዓልም ምን ወይሐልፈ። ላኪን ምነ ምድራተ ለመሰለሐተ ትበዝሕ ዐለት ወተዐቤ። ሰኒ ኣድረሰተኒ ሕሽመት መለሀይ ወኣደብ ኣምርኮ ምን (ኢሐቀ ልብል ኢሐቀ ረክብ) ቱ ለልትበሀል፡ ዲብ ኢኮን እብ መደረተ እግል እሸኬ እግልክ እንዴ እቤ ኢኮን። ዐልገት መንበ ወፈዳብ ሰልፈ ተኣመጽጽ ወደንጎባህ ምን መዐር ትዋዕም ለዘተ” ቢለዩ።

ከራይመ እብ ሰብር እግል ወድ ሐሽል ለኣተንሰ ሐቆለ ጸንሐ፡ እብ ክእኒ ትራደደ ምስሉ። “ዐፎ ለቤለ ዐፎ ግበእ ትብሉ።

ዕፋይክ ኣነ ወሰምሕኩ። እለ እንዴ እብለክ ላኪን ምን ሓለቺ ትደገግ፡ ፡ መንባካመ ክምሰል ኣነ እመን እግልዬ። እብ መተራጃ ለኢለኣምን ወለ ኢልሐሸም፡ ሸንርብ እዳይ ኖሰክ እት ኣርወሐትክ ርእሁ ህሌክ ወፋዋኑ፡ ፈክ ሕምቃመ ክልኤ እዘነክ ተኣጸምም” ቢለዩ። እት ደሚሩ እብ ፍድብናሁ እት ልትከበር። እሊ ሰድ እሊ ወድ ሐሽል እት ምቀደም ከራይ ሰጅደት ግብርኖቱ ሰጅደ። እብ ክእኒ ህይ እግል ከራይ ደሐረ። ዕለትክ ረዶም ትግበእ ለበዐል ጸገም ዕሉት። እግልክ ለይሐሸመ ኖሱ ኣመረ” በልሰ እቱ። ምን እለ ነገር እለ ወድ ሐሽል ምን ከራይ እት ፈርሀት ነብር ህለ።

ሐቆ እሊ መትባለሶም ወድ ሐሽል ደሚሩ ወበሀሉ በን በይኖም እት እንተም ጌሰ ምኑ።

ወድ ሐሽል ምን ከራይ ክምሰል ትፈንተ እት ጀፈር ዎሮ ጃርዲን እት ብነ ለትጸገዐት ሕፍረት ወእብ ሰዐር ለትገልበበት እግለ ኣቅመተ። እት ልሰዔ ህይ ኣሰክ ከራይ ጌሰ ወሐምዴታት ወሕላይ ኣብዘሐ እግሉ። “ሓይሰ መንብ፡ ረቢ እግልክ ለከፍለዩ ኣምር ወሐለት ትባርክ ኣላህ፡ ፡ ኣምር ለሐዘት እብ ተፍክር ትትዐወት እተ ወሐለት ለሐዘት እብ ቅልጭምክ ተኣደምዐ። ኣዘ እትለ ኣነን ጀፈርን ጃርዲን ህለ ወለ በዐሉ ሞተ። ኣነ ህይ እቱ እንዴ ኣቱኮ ክምሰል ምራጃ ወሸንሂቺ ከብጃ መልኣኮ መንባዬ። እንተ ኣዘ እንዴ ጊሰክ ከእግለ ጀፈረ ብናሁ ኣንዓም ካሪ እተ ህለ ምኑ ንሰእ ክምሰል ምራድክ ወሸንሂትክ” ቢለዩ።

ከራይ ሰኒ ሻፍግ እት እንቱ እንዴ መጽኦ፡ እግለ ሰዐር ክምሰል ኬደ ክባባይ እብ ወዲቅ ገብኣ መስኪናይ፡ እሊ ሰድ እሊ ወድ ሐሽል እብ ሰሓቃት ወሀርኪክ ለባካት እብ በኑ ሕናኑ ሌጠ ኣሰመዐ እቱ።

ከራይ ላኪን እበ እት ረኣሰ ወድ ሐሽል ወድዩ ለዐለ ቅብብ ወቀትል፡ ወድ ሐሽልመ ኣከይ

ንዩት ዋዲ እቱ ክምሰል ህለ ቃዊህ ይዐለ። ከራይ ሕዩር እት እንቱ በደል ምን ክብር እንዴ ኣቅበለ ምነ እተ ኣቲ ለዐለ መለገት እግል ለኣፍግሩ መንገፎ ጠልበ ምኑ፡ በክ ወመውዒታት ሀረሰ። ወድ ሐሽልመ ቅብላቱ እት በኪ ትሰምዐ። እሊ ሰድ እሊ ከራይ እብ ወድ ሐሽል ሰኒ ትነደደ። ሐር ሚተ ገብእ እግልክ ተኣበኪ ለህሌት? ኣናዲ ምንዲመ እበኪ እት ተልገ ክሩይ ህሌኮ” ቢለዩ ከትሰኣዩ።

ወድሐሽልመ “እግልዬ ተኣበኪ ለህሌት ያሬት እለ ውድቀት እለ ምስልዬ እንዴ ኢትትኣኬ ዋድቀ ምንዲ ገብእ፡ ወኣድሐንኮክ ዐልኮ፡ ፡ ኣዘ ላኪን ልብዬ ትደመለ እትክ እብ እኪትክ ክምሰል ኣተቅርድ ወዳከኒ። ኣክል ኣሕድ ህይ ‘ኣጀዛእ ምን ጅንሰ ኣልዐመል’ ልብሎ ዐረብ እዴክ ረከብክ” ቢለዩ።

ከራይ፡ “በሰ ውዳይክ ወፍዕልክ ርኢሁ ህሌኮ፡ ግድም እግል እምዬ ኣሰኢል እግልዬ። ገሌ ባሰረት ምንዲ ገብእ” ቢለዩ።

ወድ ሐሽል፡ ሰምዑ ሐቆለ ጸንሐ፡” እትሊ ኩሩይክ ለህለ ኣምራሙ ህሌኩ። መግሀፍ፡ ጠመዕ ክብር እግል ሓለትክ ኣትዓባይ፡ ቅብብ ወነፍሰክ ዩኣመርት ወኢመዚን ቱ። ለዐበ ኣሰባብ ወኣሰብር ውድቅክ እት ሕፍረት እሊ ለእግሉ ደገምኮ እነቱ። ኣዘ ህይ ሐቆ እት ሕፍረት ወደቅኩ ምነ እብ ሰላመት ፍግረት ረቢ ደለዩ እንዴ ኢኮን፡ ከንዶእ? ኢትፈግር ምኑ። ላባም ሚ ልብሎ መስለክ!? “(እግል ኣክረቱ ለኢለሐሰብ እት ጭዊተ ልትሐኔ ወወድቅ።)

ከራይ፡ “ፈታይ ኣነ ትብል ዐልክ ወእግል ምስንዮቼ ተኣትሓሌ ወትሐዘ። ኣዘ ፈታይ ወድዩ ውዴ ወእብ ኣክይ ውዳይዬ እግል ኢትትመክሐ ወእኪቼ ኢትተምኒ። ሳምሐኒ ዐፈኒ ለኢጌን የሀለ። በልሰ ከራይ ሕዩር እት እንቱ።

ወድ ሐሽል፡ እብ መዋዲቱ ቀዳም እግል ለኣትዕሱ ቃሰድ እት እንቱ ክምእነ በልሰ እቱ። ክሉ መዋዲተክ መዋዲት ክልኣት

ኣባዩም ኣሕድ ሰራይር ትመሰል እቺ። እብ ሐጫር ድግም ለዎርቶም እግለ ካልእ ቅርጡዋ እግል ሀበካቱ እንዴ ቢለዩ፡ ከእግል ልትነዐዩ ወልብልዑ መጽኣዩ። ላመ ልትቀሸሽ ለዐለ እበ እግለ ሰምዐ ህግዩ እንዴ ኣምነ ተለው ቢለ እብ ምጽኣት። እሊ ኢኮን እግል ብልዐቱ ዱሉይ እት እንቱ ጸንሐዩ ከለወውሽ ወደዩ። ህቱመ ሰጋዬ ሰምቱ እግልክ” ቢለዩ። እብለ ላመ ካልኣይ እበ እግሉ ባልዕ ለዐለ ሰገ ኣሰሩ ገብኦ። ኣዘም እሊ ኣምሳላት እሊ ሚ ሐዘቱ ትብል ትገብእ? (እግል ሐሁ ሕፍረት ለሐፍረ ሐፍራዩ ወድቀ እተ።) ኣማንተ ሌጤ። እንተ ህይ ትካዩንከኒ ወትባለምከኒ፡ ወለ እግለ ራክብ ህሌክ እዴካተ ትሕፈን እትክ ወትብረድ” ቢለዩ።

ከራይ፡ “እኪት ለእግለ ወዴኮ እግለ ኢተኣትፋቀደኒ። ለዲበ ክሩይ ህሌኮ መለገት ህተ ትከፈኒ። ፈታይ ወገልገላይ ወመልሀይ ወመሰኒ፡ ክምሰል ኣሰማዮም ኣሰክ እብ ሩሐም ፍዘ ለገብኦ ሕዳም ኢኮን። ኣነነት ፈታይ ወመልሀይ ህይ ክእኒ ክምሰልዬ እት ተልገ ለትከረ ህቱ ደለዩ ወለኣምረ። ህቱመ እት ወቅት ሰድት ወተልገ ገለብ ገብእ ወሴፈ። ሕጌ ገብእ ከለሐልፍ ቀደሚኩ። ሐሬ ህይ ጸድቅ ገልገላይ ኣነነቱ ወራድኢቱ ምን ርድኣት ሐ ወድ እም ትትፈደል ወትሸፍግ። እግል እለ ወዴክ ምንዲ ገብእ እግል ዲመ ኣልዳይም ለትትነፈዕ እቡ ኣብሳር እግሉ እግል ኣድርሰካት” ቢለዩ።

ወድ ሐሽል፡ እት ክምሰል እለ ናይክ ለመስሎ ሰብ ዐቅል ለቤለወ እግል እድገም እግልኩ። ክእኒ ክምሰልክ ኣምርም ምን ከርሽቶም ለኢለሐልፍ ክምሰል ረኣው ቢለወ። (“ጽንዒ ግናዘት ጽንዕ ቱ።) (እግል ረዩም ሐሲብ ምን ዐቅል ቱ። ቅርቡ ህይ ምን ቅዌት”) ኣመልክ ወኣከይ ውዳይክ ለኢዳሊ ልርሕም እትኩ፡ ፡ እንተ ህይ እግለ እብ ድራሩ ትሐደሬክ ጢሾ ሕድርኖትክ ትሰብር ወለ መጤተክ እዴ እግለ ትነክሹ። እግል ፈጅርክ ትወድዩ ጸንሐ ይእንተ ወዮም ኢትመጽእ እትኩ። ሐሬ ከፎ እንዴ ወዴኮ ኣነ ፈታይክ እግል እግበእ ትትጸበረኒ ህሌክ? ቅዌትክ ወሕምቅ ፍክርክ ኣተኣመርከኒ። ሀሮደ ከራይ።


ምን መልሀይ እሙን እት ዐዶ ከሲም ኖሰክ ቀዩርከኒ። እለ ዘዐት እለ መንድርብዩ ባቅዐት ኮናት ትፈድብ። ያጅማዕ!! ልብል ቢለው ጅማዐት ኣለቡ። ለእግልዬ እግል ትንፈዕ እቡ ትሐሰብ ለህሌክ ፍክር ወለባበት ወኣምር ወበሰር እግል ርሕክ ትነፍዕ እቡ ምን ዮም ተኣኪ እትክ ኣለቡ። ሰድት እብ ሰድተ እለ እንተ እት ቁሪን ሕፍረት ትበኪ ወትሓኪ ህሌክ” ቢለዩ።

--

በሊሱ የምካን እተ ለሐልፈ መናበሳት፡ ዲብ ተፋሲል እግል ኢንኦቲ፡ እግል ኢልፍየሕ ወኢሊሪም እንዴ ትብህለ እብ ሐጪር ለልትቀደም ሀለ ሳኪን አኑ፡ ለፊሆም እግል ልዕቤ ወልፍየሕቡ እብል። እግልሚ እግለ ለከሰሶም ሌጠ እንዴ ተሐጨረ ለተርፍ ኢኮን። ክም መጠገሲ ሳኪን፡ እሊ ናይነ ናይ ሳልሳይ ዐለም አውመ ናይ ለኢትጠወሪየ ድወል ለልትብህል እቅትሳድ፡ ምን እዴ ዲብ አፍቲ። እሊ ለበሀለት ገሌ-ገሌ መዋድ ለለአፈሪ ወኢሰክ ካርጅ ለልልእክ ኢገብአ ምን ገብእ፡ ኖሱ እግል ልሰሰዐ ወዲብ ደረጀት ሰናዐት እግል ልትዐዴ ወለአፍሬ ለቀድር እቅትሳድ ኢኮን። ከእሊ ምን ሐቲ መርሐለት ዲብ ሐቲ መርሐለት እግል ትትዐዴ፡ እብ ፍንቲይ ምን እቅትሳድ እዴ እት አፍ እንዴ ፈገርን ዲብ ደረጀት ሰናዐት እግል ንትዐዴ ገብአነ ምን ገብእ፡ እግሉ ለተኣትሐዜ አሳሰ ጣቀትተ። ከህረበት ለአሉብክ ሐቲ እግል ቲዴ ኢትቀድር። ምን መብረሀት ሸዋሬ፡ አብያት፡ መአሰሳት አስከመ ዲብ መሳኔዐ ለተኣትሐዜ ቅወት ጣቀት እበ እግል ትትሃሄ ትቀድር። ከእሊ እት ኩሉ ደረጃት ዐማር ወሰናዐት ለሀለ እግልነ አሸቃል ብናእ ረአሱ ቀደም እግል ለአሳድር ገብአ ምን ገብእ፡ ከደማት ጣቀት ታምም ወካፊ እግል ለሀሌቡ። ከህረበት ለአሉቡ ወለሐቲመ ሽብር ረአሱ ቀደም እግል ለሄርር ኢቀድር። እሊ እብ ምዑት ቲ። እበየ ገበይ ምን ደረጀት እት ደረጀት እግል ንትዐዴ እንቀድር። ለናይ ጣቀት በፊምጅነ ከአፎ እተ ለትትሐዜ ደረጀት ነኣበጽሐ። እብ ደረጀት ወጠን 120 ሚጋ ሀለ ምን ልትብህል ፣120 ሚጋ ዋት ጣቀትተ እንዴ ትቤ እግል ትትሃሄበ ለልትቀደር ኢኮን፡ ሳኪን መኣንበቲ ገብእ እኑ። ክምሰለ እተ ለሐልፈ አውቃት ለትሸርሐ፡ መታክል ወመሐስኪት ብዞሕ ሳደፊዩ ብህላም ዐል። 120 ሚገ እንዴ ትቤ መትሃጋይ ተርጀመት ለቡ ኢኮን። እብ ኣላፍ እግል ንትሃሄ ብኩ። ዲብ እብ ኣላፍ ለንትሃሄ ዲብ ደረጀት እግል ንትዐዴ ገብአነ ምን ገብእ፡ ለዲብ ኩሉ ደረጃት አሸቃል ዐማር ለተኣትሐዜነ ቅወት ጣቀት ከህረበት እግል ነአፍሬ ቀደርን ወመጦር እሊ ፍሬ እሊ ህዩ ዲብ ደረጀት እቅትሳድ ድቁብ ንትዐዴ ሀሊነ እግል ኒበል ገብአነ ምን ገብእ፡ እብ 100 ወ120 ሚጋ ለትትበጸኡ ደረጀት ኢኮን። ምን እሊ እግል ክድመት ጣቀት ሳደፊ ለእምበሉ መሐባልክ ለደረሰናሁ ሀለ ሳኪን፡ ለማርሓይ እት መርበይነ አውመ ዲብ ሀደፍነ ወመብዳእነ ሚቲ። እስትራተጅየትነ ሚቲ፤ መባጽኡነ ወትምኔትነ ከአፎ እብ ወቅት እንቀይሱ፤ ምን አየ ደረጀት አስክ አየ እግል ንብጸኡ ነሐዜ ሀሊነ፤ እግል ልትፈረግበ። እሊ

መስለን፡ ዲብ ኪዩ እትሰን ለሐሐፊተ ዐስር ከም ሰነት ሌጦ ለትጠወረ ብዙህ ርእያም ህሉ። ዲቦም መስለን ቀድሞ 17 ሰነት ሐድ 20 ሚጋ ሌጦ ተአፈሬ ለዐለት ዓማት ጣቀቶም የም፡ አስክ 1100 ማጋ ባጽሓም ህለው። ዲብ ኪዩ ሌጦ ምን 10 አስክ 15 አልፍ ሚጋ እግል ለአፍሬ ለቀድር ክቡን ርዝቅ ህለ ልብሎ። እብ ፍዕል ላኪን አስክ እለ ሻቆያሙ ለህለው አስክ 1100 ሚጋቱ። እሊ ህዩ ሑድ ኢኮን። ከሕት ክምሰሌህ በርናምጅ እግል ነኣቲ ገብአን ምን ገብእ፡ ድራሳት ካሬ እግል ልግበእቡ። መገበሰነ ለእምቤለ 360 ሚጋ እግል ትግበእቡ። ለዐበ በክት ናይ እሊ አቤ ሚቲ፤ ተምዊል እግል ትርኩብ ትቀድር፡ ምን ቲክኖሎጂው ለካርጀክ እግል ትሕሬ ትቀድር። ምላዐል ኩሉ ላኪን መቅደረት ርዝቅ ኣይምክ እግል ተግባሩ ብከ። እት መቅደረት ኣይምነ እለን ለእምቤለን 12 ባርታ በንበን እንዴ ዐለየ ሐሬ ምስል ወቅት ወተጠውር ዲብ ሐድ እንዴ ተሐበሪየ ኦሮት መርከዝ ዓማት ጣቀት ከህረበት ክም ገብአየ፡ እብ ሕበር እግል ተአሽቆየም ለትቀድር፡ ወምስለ ለህለ ቲክኖሎጂ ለትትመጣወር ቅወት ኣይም ብቅዕት እግል ተህሌ ላዝምቲ። ከምክ እተ ለሐሐፊ አውቃት ለረከብናህ ተጅርበት ወለረኤናህ መካልፍ ዲብ ሕሳብ እንዴ ኣቲ። እብ ኩሉ ለካርጀክ ወቅት፡ ወቲክኖሎጂ፡ ተምዊልመ ክም ረከብናህ ወእበ ለትትረተህ እግልነ እግል ገሽቐ ዲቡ ለእንቀድር፡ እግል ኩሉ ደማት ለትገብእ እግልነ መቅደረት ኣይምናተ። ምስለ ሄራርለል ተጠውር ቲክኖሎጂ ለትትዓደለ ቅወት ኣይም ዕልምት ወጅርብት ተኣትሐኪኹ። እሊ እንዴ እንጠውር ሐቆ ግስናቱለ ሕነ ለናይ ጣቀት ከደማትነ እብ ፍሬህ ልግበእ ወኣድመየቲ እግል ልትአክድ ለቀድር። እሊ ኩሉ እብ ሕበር ክም ኦሮት በርናምጅ ዲብ ሐድ እግል ልትጨመርቡ። ምኑ ወዲቡመ፡ ኣፍሪየት ጣቀት ሌጦ እንዴ ኢገብእ። የም መብረህት ትትፈናቲ። ለትፈናተ ኣጅናስ ቅወት ከህረበት ህለ። ከለትሰህለ ወለሐሰ እግል ንሕሬ ብከ። ከእሊ ምን እንወዴ ምነ እቅትሳድ እዴ ዲብ ኣፍ እግል ነኣሳሬ ምኑ ወዲብ እቅትሳድ ሰናዐት ወደማካት መስተቀበል እግል ንትዐዴ ገብአን ምን ገብእ፡ሚ ለመስል ከደማት ጣቀት ለኣትሐኪኹ ክም መስል እግል ንንበእ እንቀድር። ግጥን እግል ነኣፍሬ እንቀድር። ዐማር ሐርሰቲ። ከምነ ሐርስ ወፍሬ ግጥን ዲብ ሰናዐት በለሊት እግል ንትዐዴ ገብአን ምን ገብእ ላኪን፡መስናዕ ለኣትሐኪኹ። ከለ መቅደረት ሰናዐት ምስለ ናይ ጣቀት መቅደረት እግል ልትረኤቡ። ዲብ በራምጅ ዐባዩመ እግል ንትዐዴ እንቀድር። መስለን ሐጺን ህለ። ከሐጺን እግል ነኣፍሬ ገብአን ምን ገብእ፡ እግልነ ሐዲስ ኢኮን። ዲብ ጎዳይፍ ኦሮት መስነዕ ሐጺን ዐለ። እሊ መስናዕ እሊ መሳምር፡ ወሲክ ሽቂ ዐለ።

8^ኛ ክፈለ



ሕመዳይ ዲብ ጃምቦት በቅዳድ 1969

እትሊ ወክድ እሊ ምን አዕደ ጀብህት ተሕሪር ምስል ሽዕብዩት መፋህመት ትግበእ ለልብሎ ብዝሓም ዐለው። ጀብህት ተሕሪር እሊ ህድግ ምስል ሽዕብዩት ራድዩቱ ሰበት ይዐለት። እግላ ህድግ ልብሎ ለዐውመ ፋሉል እንዴ ትቤ እግል ትትነዐዮም አስተብዴት። ፋሉል ክመ ልትአመር ዲብ ሰነት 1977 ምን ጀብህት ተሕሪር እንዴ አንፈሰለው ዲብ ጀብህት ሽዕብዩት ለተሓበረው ክፋል ጀብህት ተሕሪር ቶም። እትሊ ወክድ እሊ ኢብራሂም ቶቲል መስኡል መክተብ ስያሴ ወዐብደለ እድሪስ መስኡል መክተብ ዐስከር እንዴ ገብአው ሕራዮም ዐለው።

ኢብራሂም ቶቲል ዲብ እድሪስ ሕመዳይ ርሳለት ነድእ ወእብ ሸፋግ ዲብ ሞጎራቤብ ምጽእ ልብሎ። ወሕመዳይ አዋምር ቶቲል እግል ልነፍዝ ዲብ ሞጎራቤብ መጽእ። ሕመዳይ ዲብ ሞጎራቤብ ክምስል መጽእ። ቶቲል እግል ሕመዳይ “ሰሚናር እግል ኒዴ ነሕዜ ህሌን ወለሰሚናር እንተ እግል ትምርሐቱ ለልብል አዋምር ለሀይብ።

ለሰሚናር እግል አርበዕ ውሕደት እዳርየት በህለት 1.2.3. ወ4 እግል ልግበእቱ ሕሱብ ለዐለ። ምን ውሕዳት እዳርየን ወምነ ጅኑድ ምን ክል ውሕደት ዐስከርየት ዐስር ነፈር እግል ልምጽኡቶም። ሕመዳይ እብ አሳሰለ ተሀየቦዩ መምሬሕ እግላ ዱሊት ለዐለት ወረቀት ሰሚናር ኖሱ ቀርእዩ። ጽባዋ ናይለ ወረቀት ህዩ “እሊ ፋሉል ወድዉ ለህለው ክቡት ኢኮን ወሕነ ምስል ምዳደት (ሽዕብዩት) ህድግ እግል ኒዴ አለብክ እግል ንሰፍዮም ብ” ለትብል ዐለት።

ሕመዳይ ለወረቀት ክምስል ቀርእ ለቴለል ሰበት ይአመመእዩ ዲብ ቶቲል እንዴ ጌሰ “እሊ ከጠቅቱ። ተሰፍየት እግል ትግበእ አለብ። እሊ እፍንጉራሙ ለህሌኩም ቀራር ጌጋ ቱ። ወእሎም ፋሉል ትብሎም ለህሌኩም መፋህመት ኒዴ ልብሎ ህለው። ፋሉል ተሰፍየት ኢገብእ እሊ ወረቀት እሊ ምን ኢትቀርብ ተሐይሰ። ሰበት እሊ ገብእ እግልከ ምንገብእ ተዕዳል ውዴ ዲብ።” ክምስል ቤለዩ ቶቲል ህዩ።



ምናድሊን ሰውረት

ሕመዳይ፡ ጀላብ ተዕሊም ወንዳል

“አነ ዲብ እሊ ወረቀት እሊ ተዕዳል እግል ኢዴ ይእቀድር። እግልሚ ልጅነት ተንፊዝየት ቀረረተ። ወአነ እብ ቀራር ልጅነት ተንፊዝየት ቱ ለእገይሰ” ለልብል በሊሰ ሀበዩ። ሕመዳይ ከላሰ ሰበት ጀብረዩ ለሰሚናር እግል ሊደዩ ቀረረ። ለወረቀት ላኪን ቀደም ለህ ዲብ ዴሽ ክምስል ሴርኩላር ውዝዕት ሰበት ዐለት። ለምናድሊን አምራም ዐለው። ወእብሊ ለአርበዕ መናጥቅ ክምስል መጽአው። አንፋር ረቅም አርበዕ እግል ሕመዳይ “ሕነ ቀደምለ ሰሚናር እብ ሰበት እሊ ወረቀት ተውዴሕ እግል ልተሀየብኝ እጅትመዕ እንጠልብ” ልብሎ። እሎም ከረ አብረሃለዴ ክፍሌ ወሰዲድ ሳልሕ ወብዕዳም ክሉ ክሉም 15 ነፈር ለገበኦ ዐለው። እብ አሳሰ እሊ ህዩ ሕመዳይ ቀደምለ ሰሚናር ምስል እሎም እጅትመዕ ወዴ። ዲብ እጅትመዕ። “እሊ ሰሚናር እሊ ምስል ሽዕብዩት ሐርብ ልግበእ ለልብልቱ ወሐርብ ሕነ ራድዮሙ ይሕነ። ሰበት እሊ። ቀደምለ ሰሚናር ሕነ ቶቲል እግል ንርከቡ ነሐዜ ሰበት ህሌን ትላከዩ እግልነ” ልቡሉ። ሕመዳይ እግል ቶቲል ክምስል አሰአሉ። ቶቲል ህዩ “ለህለ እግሎም ረአይ ዲብ እጅትመዕ ለአቅሩቡ ዲኢኮን አነ አዜ ምስሎም እጅትመዕ ይእወዴ” ለልብል በሊሰ ለሀይብ።

እትሊ ወክድ እሊ ቃእድ እዳረት ረቅም ዋሕድ መሐመድ ሓምድ ትምስሕ ዐለ። ትምስሕመ እሊ ጠሰብ እሊ ምንመ ዐለ እግሉ። ክሉ ለዐለ ረአይ እብ ጀህት ሕመዳይ ዲብ ሰሚናር ቦሉ ሰበት ትበህለ ዲብ ሞጎራቤብ ለሰሚናር ገብአ። ወዲብሊ ሰሚናር ቶቲል ከሊመት መክሰቲ አሰመዐ። ሐቆ እሊ ሕመዳይ ለእግል ሰሚናር ዱሊት ለዐለት ለወረቀቱ እግል ልቅረእ እት ልዳሌ ክሎም ጅምዓም ለዐለው ምናድሊን መቃወሙት ለአሰመዮ። ለወረቀት ህዩ እግል ትትቀረእ አለበ ልጅነት መፋህመት እንዴ ከወንክኩም ምስል ሽዕብዩት ልግበእ ውበዕድ መፋህመት ትግበእ ለልብል ረአይ ለሀይብ።

ቶቲል መቃወሙት ሰበት ሳደፈት ህቱ ወተሰፋይ ተክሌ ሰለሰ ምዕል እግል ለአፍህምም ምስል ጅኑድ እጅትመዕ ወደ። ወምን ልጅነት ተንፊዝየት ከረ አምነ መለኪን ወመሐመድ አሕመድ ዐብዱ ዐለው ወክሎም ለሓለት ታብዖ ወሰመዮ። ለሰሚናር ህዩ እብ መቃወሙት ምናድሊን ክምስል ፈሸሉ። ቶቲል “ከላሰ እሊ ሐቆ ገብኡት ክል ዎር ከዲብ መንጠቀቱ ለአቅብል ወእሊ ልትበህል ለህለ አነ ዲብ ተንፊዝየት እግል አቅርቡቱ” ልብሎም ወእባሁ እግል እድሪስ ሕመዳይ እንዴ ትላክ “እድሪስ እንተ ቀደም እሊ እግል ዕላጅ ሱዳን ተትቃብል ዐልከ ወህቱ ኢነፍዐ ምስልከ። ወአዜ እግል ዕላጅ ሱርየ እግል ቲጊሰ ሰበት ትዋፈቅነ ሱርየ

ጊሰ ወተዓለጅ” ልብሎ። መጅብ ድግናቱ ለዐለ።

ሕመዳይመ ረአይ ቶቲል ኢትቃወመ ላኪን ቀደሙ ዲብ መንጠቀቱ እንዴ አቅበለ ምስል ጅምዓቱ እጅትመዕ ወዴ ወእግላ ህለ መምተለካት እግል ልሰልሞም ቀርር ወቶቲልመ ልትከብቱ። ሐቆ እሊ ሕመዳይ ምን ሞጎራቤብ አሰክ ውሕደት ረቅም አርበዕ ዐንሰበ ለአቀብል። ወእብሊ እግላ ዲብ ሰለሰ አካን ዲብ ዐንሰበ ለዐለ መዐላክር ጀብህት ተሕሪር እጅትመዕ ወዴ ወእግል ዕላጅ አሰክ ካርጅ ገይሰ ክምስል ህለ ለአፍህምም። እብሊ ሕመዳይ ልሳረሕ ምናም። ሱዳን ለአቱ ወምን ሱዳን አሰክ ሱርየ ለአተላሌ።

ሕመዳይ ዲብ ሱርየት ዕላጅ ክምስል ወደ ሚዳን እግል ለአቅብል በርናምጅ ለአፈግር። አዜመ ዲብ ሱርየ ዲብ እንቱ ተንፊዝየት ርሳለት ነድእ እቱ። ለርሳለት “እንተ መንዱብ ጀብህት ተሕሪር ዲብ ዐደን እግል ትግበእቱ። እግልሚ እንተ ለየመንደን ሰኒ ተአምርም” ልቡሉ። ሕመዳይ ዲብ በቅዳድ ደርሰ ዲብ ህለ ምስል የመንደን ብዝሓም ኡሙር ዐለ። ወእብሊ ለተሀየቡ አዋምር ምን ሱርየ አሰክ ዐደን ገይሰ። ቀደሙ ላኪን መሐመድ አሕመድ ዐብዱ ምን ሚዳን ዲብ ሰዑድየ ዝያረት ወዴ ሰበት ዐለ። ሕመዳይ አሰልፍ ዐደን እንዴ ኢገይሰ ምስል መሐመድ አሕመድ እግል ልትዋጀህ ሰዑድየ ገይሰ። ምን ሰዑድየ ህዩ አሰክ የመን ረሳይል እንዴ ነሰአ ገይሰ። እተ ወክድ ለሀይ መስኡል ዕላቃት ካርጅየት ጀብህት ተሕሪር ዐብደለ ሰሌማን ዐለ።

እብ አሳሰ እሊ ሕመዳይ ምን ሰዑድየ አሰክ ቅብለት ወግብለት የመን ለዐለ ረሳይሉ ነሰአ ወክመ ትበህለየ አሰክ የመን ሳፍር። ዲብ የመን መክተብ ዎር ዲብ ዐደን ወመክተብ ሐዲስ ዲብ ሰንዐ ቅብለት የመን እግል ልግበእ ሰበት ተሐዜ ሕመዳይ መስኡል ናይ እሎም ክልኦት መክተብ ገብእ ወመሃሙ ዲብ የመን ለአነብት። አሰልፍ ዲብ ሰንዐ ምስል ወዘር ካርጅየት ቅብለት የመን ልትዋጀህ ወርሳለቱ ሰልሙ እሊ ህዩ ዲብ ሰነት 1977 ቱ ለዐለ።


እትሊ ወክድ እሊ። ዲብ ሱርየ ርኢሰ መክተብ ካርጅየት ናይለ ተንዝም ለዐለ ሳልሕ እያይ ቱ። ወሕመዳይ ዲብ ሰንዐ መክተብ እግል ልፍተሕ መዋፈቅት ክምስል ረክቤ ዲብ ሳልሕ እያይ ተለፈፎን እንዴ ዘብጠ እተ ናይ ሰንዐ መክተብ ለገብእ መንዱብ ንድኦ እፍ” ልብል።

ሕመዳይ እሊ ናይ ሰንዐ መክተብ ክምስል ወጀህ አዜመ ርሳለቱ እንዴ ጸብጠ ምን ቅብለት የመን አሰክ ግብለት የመን ትወክለ። ወዲብ ዐደን ክምስል አተ ዐደንደን ሰኒ ልትከብቱ። እትሊ ወክድ እሊ ወዘር ዳኽልየት ግብለት የመን ለዐለ ዲብ በቅዳድ ምስል ሕመዳይ ደርሰ ለዐለ ሰበት ቱ። “ለአምረክ ሰኒ ቀብረክ” ክምስል ልትበህል ሰኒ ትከብቱ ወተሐደረዩ።

ሐቆ እሊ ምን ከረ በቅዳድ ወሱርየ እግል ሰውረት ለትገብእ ሰዳይት ሰለሕ ውሴፈ እብ ጥያረት አሰክ ዐደን ልትነደእ ዐለ። ለሰለሕ ወሴፈ የመን ክምስል አተ ዲብ መዐስከር ሰበት ሀበደም እግል እሊ ሰለሕ ወሴፈ እንዴ ትከብተው ዲብ ጅላብ ልጽዕኑ ወአሰክ ሚዳን ነድኡም ዐለው።

እትሊ ወክድ እሊ ሕመዳይ ወጅማዐቱ ክሉ ለልትቀደሮም ወዱ ዐለው። ወየመንደንመ ሰኒ ልትዓወኖ ምስሎም ለዐለው እቱ ወክድ ቱ። ከረ ሕመዳይ እምበል እሊመ እግላ ዲብ የመን ለዐለው ኤረትርዩን እንዴ ዝመው እብ ሰበት ወጠኖም ወሰውረቶም እግል ልሕሰቦ ወምስል ሰውረቶም እግል ልትዓወኖ ዝመዎም።

ሕመዳይ እት የመን ዲብ እንቱ አዜመ ርሳለት ሐዳሰ ነደኦ እቱ። ለርሳለት ህቱ ወክድ ጀብህት ተሕሪር እንዴ ገብኦ ዲብ እሕትፋል ዒድ ሕርየት ጅቡቲ እግል ልሻርክ አዋምር ለሀየቡ። ሕመዳይ አዜመ ምን ዐደን አሰክ ጅቡቲ ሳፍር። እብሊ መናሰበት እሊ ህዩ እግል ጅቡትዩን አሰናይኩም ዲብ አወላይ ዒድ እስትቅላልኩም አብጸሐኩም ልብሎም ወምስሎም እግል ዲብ ጅቡቲ ለዐለው ምዋዋኒን ነዝም ወመክተብ እግል ልፍተሕ ምስል ሰብ ሰልጠት ጅቡቲ ልትፋህም። እሊ አዜ ርኢሰ ጅቡቲ ለህለ እስማዒል ገሌ። እተ ወክድ ለሀይ መስኡል መክተብ ዐለ። ርኢሰል ደውለት ብዕድ ዐለ። ሰብ ሰልጠት ጅቡቲ ህዩ መርሐብ እብኩም ኤረትርዩን ሕነ ወእንቱም ሐው ሕነ ወመክተብኩም ክሰቶ ወዐድ



ምናድል ሳልሕ እያይ

ዐድኩምተ ልቡሎም። ሐቆ እሊ አዜመ ጀብህት ተሕሪር ዲብሊ ሐዳሰ ደውለት ጅቡቲ መክተብ ትከሰት። ሕመዳይ እባሁ አሰክ ሱርየ ዲብ ሳልሕ እያይ ለቴለል ለትሸፊሕ ርሳለት ነድእ። ወለርሳለት አሰክ ጅቡቲ መንዱብ እግል ልንደኦ ለተሐብር ዐለት።

ሕመዳይ እሊ ተውጅሃት እሊ እንዴ ሀበ ምን ጅቡቲ አሰክ ዐደን ለአቅብል ወክሉ ምነ መክተብ ለልጠለብ ወዴ። ወእብሊ ሓለት እሊ ለምን ከረ ዒራቅ ወሱርየ ትመጽእ ለዐለት ሰዳይት እንዴ ትከብቱ አሰክ ሚዳን ነድእ። ወእግላ ዲብ እብ ዶልዶሉ መጽኦ ለዐለው ሽዑብ ኤረትርዩ ነዝም ወእብ ክኢን ዲብ የመን እግል አርበዕ ሰነት በህለት ምን ሰነት 1977 አሰክ ሰነት 1981 ሸቀ።

እትሊ ወክድ እሊ ክምስል እሊ ነአምር የመን እት ክልኤ ክፍልት ዐለት። ቅብለት ወግብለት የመን። እብ ፍንቱይ ግብለት የመን ምን እብ ጀህት እተሓድ ሶፊት ደቅዋ ዋጀህም ዐለ። ህቱ ህዩ እትሊ ወክድ እሊ ይሳርዩን በህለት እሸትራክዩን ሰበት ዐለው ወአቶብያመ እተ ክምስልህ ሰበት ዐለት ምስለ እተሓድ ሶፊት እግል አቶብዩ ትወድየ ለዐለት ሰዳይት ወአቶብዩን እብ ጀህቶም እት ዐደንደን ደቅዋ ወዱ ሰበት ዐለው። ቀደሙ ዐብደልፈተሕ እስማዒል ኡዲስ አበበ እንዴ ጌሰ ኤረትርዩ እስትቅላለ እግል ትንሰእ ብእት ብህሎም ዐለ።



ምናድል እድሪስ ሕመዳይ 2023 አሰመረ

ዐደንደን እትሊ ወክድ እሊ። ምስል እተሓድ ሶፊት ወአቶብዩ ባዋራም ሰበት ዐለው። እብ ደቅዋ እተሓድ ሶፊት ድድ ሰውረት ኤረትርዩ እግል ልብጠር አዋምር ልተሀየቦም ሰበት ዐለ ወክለ ሰዳይቶም ምን ሶፊት ሰበት ዐለት ፍንጌ መዋሐን ወወለተ ሰበት ተሐነው ዲብ ደንጎበ እግል ሕመዳይ እንዴ ትላከው። ለመክተብ እግል ልደበኦ ክምስል ቡ። ወለምን ድወል ዐረብ ውበዕድ ለመጽኦ ሰዳይትመ እብ ዐደን እግል ልሕለፍ ክምስል አለቡ ለመዓወት ፍንጌ ዐደን ወጀብህት ተሕሪር ህዩ ሕኔት ርኢት ሰምዕት ትገብእ እብ ምስጢር እግል ትግበእ ክምስል በ አዋምር አሰደረው እቱ።

ሕመዳይ ሐቆ እሊ ዕላቀት ምስል ግብለት የመን ሰበት ደዐፈት ወግብለት የመን ምስል አቶብዩ ሰበት በዋረት ህቱመ መክተቡ እንዴ ደብኦ አሰክ ሱርየ አቅበለ። ወምነ ሕመዳይ አዜመ መንዱብ ጀብህት ተሕሪር ዲብ ሞርኮ እግል ልግበእ ትየመመ። እትሊ መደት እሊ ዲብ አልሙቅርብ መክተብ ናይ ቅዋት አሸብዩ (ሰቤ)ዐለ። ሕመዳይ አልሙቅርብ ክምስል ጌሰ ሕኩመት ሞርኮ ሕነ ዲብ ዐድነ እግል ሰውረት ኤረትርዩ ብዙሕ መክተብ ይእንከሰት። ዲብ ናይ ቅዋት ሽዕብዩት መክተብ ምስል ገብኦኩም ምንገብኦ ሰኒ። ለትሰረረተ ካልኦይ መክተብ እግል ንክሰት ላተ ይእንቀድር ለልብል በሊሰ ለሀይብ።

እብሊ ሕመዳይ ፍንጌ ለህ ወለህ ገብኦ። ሕኩመት ሞርኮ ብዕድ እግል ጀብህት ተሕሪር ለገብኦ መክተብ ክምስል ኢትክሰት ወእብሊ ምስል መስኡሊት ዲብ ልሻወር። ሱድሬት እዛዐት ለንደን ቢቢሲ ፈቲሕ ወለለአሰፍ ከበር ምን ከርሰ ሚዳን ኤረትርዩ ሰምዕ። ለከበር ሚ ልብል “ዴሽ ጀብህት ተሕሪር ኤረትርዩ ምን ሚዳን ዲብ ምድር ሱዳን አተ” ለልብል ከበር ክምስል ሰምዕ። ሕመዳይ እባሁ ዲብ ዶማሰቆ ተለፎን ወዴ ወሀቶምመ ክምስል ህቱ ሳምዑ ለህለ ክምስል ሰምዐዉ ለሐቡሩ።

ሕመዳይ ሐቆ አቲ ጀብህት ተሕሪር ምድር ሱዳን። ምን ሞርኮ ሱርየ ለአቀብል ወዲቡ ከረ ሳልሕ እያይ ወመሐመድ ዑመር ዩሕዩ አሰክ ሱዳን ዲብ ልትበገሰ ክምኩማም ዲብ እንቶም ጸንሐም። ወህቱመ ሳልሳዮም እንዴ ገብኦ ምን ሱርየ አሰክ ሱዳን ልትበገሰ። ከረ ሕመዳይ ሱዳን ክምስል አተው ልጅነት ተንፊዝየት ጀብህት ተሕሪር ዲብ ከሰለ ትጸንሐምም። ዐብደለ እድሪስ ህዩ ምስል ፍንጠራም ለዐለው ጅኑድ ዲብ ራሳይ ለልትበህል ባኮት ዐለ። እብሊ ጀብህት ተሕሪር ዲብ ሰለሰ ክፋል ገመምዕ ገኦት ለልብል ከበር ዲብ ከሰለ ጸንሐዮም እሊ ህዩ ዲብ ታሪክ ጀብህት ተሕሪር ለለአሰፍ ወለለአግዔ ቴለል ቱ።

ትተላሌ.....

መቃበለት ወዘረት ዐድል አሰይደ ፎውዝዩ ሃሽም እብ መናሰበት ሳምን ቃኑን ውዛረት ዐድል

ተርጀመት= መሳ መንደር



ሰአል- ሓይሰት ወዘረት፡ ሀደፍ እለ ሳምን ቃኑን ሚቱ ወምን ደዓም ለገብአት ሳምን ቃኑን እብ ሚ ትፈንቱ ወምን ናይ ደዓም ሚተጃርብ ትረከብ

በሊሱ፡ ዲብ ዲሰምበር ናይ ሰነት 2021 እተ ለወዳኖህ ሳምን ቃኑን፡ “ቃኑን ወዐማር ወጠን” ለትብል ስቅራት ዐለት እለ። እሊ እምብል እንዴ ህሌ፡ ምነ ነባሪ መጅተማዕ ኤረትርዮ ለወክል ተእሪክ ወዓዳት እንዴ ትብገሰ፡ እምበል አትካራም እንቁቁ ዲቡ ለጸንሐነ ብናእ ወጠንየት ወሐቅ መዋዋን እግል ነአክድ እንዴ እንቤቱ። እግልሚ፡ ሕነ ምንኬን ዕሉን ወሳይቅ ለገይሰ ተእሪክ እኩድ ወሐቂቀት ብኸ። ምን ክልኦት ለልትቃረም አፍካር ወመባድእ እንዴ ፈገርነ ዲብ ትቡት ናይለ ለነህይቡ አውመ ለእንቀድሙ ከደማት ቀዋኒን ዕሉን ሌጠ እንዴ ኢገብእ፡ እሊ ቀዋኒን እሊ እግልነ መሰል መ ኢፋሉ፤ ሕነ ህዩ እግሉ እንመሰል መኢኮን፤ ለቀዋኒን እግል መጅተማዕነ መሰል ሚኢመሰል፤ እግል ልትደረስ ውዛረት ዐድል እምበል አትካራም ትከድም ዲቡ ጸንሐት።

ለአሳሰዩን ቀዋኒን እንዴ ትፈረገው ወትዳለው ዲብ ሸዑብ ክም በጽሐውመ ክልነ ለእንፈቅዱቱ። እሊ ዲብ ሰነት 2015 ለተአምበተ ለዲብ ባካቱ ለህሌ አፍርዐት ሌጠ እንዴ ኢገብእ፡ ሐድ አክል አዩ እግሉ ነባሪን ሻርሐ ወማሰሉ ሀሌ፡ እብ ፍዕል ህዩ፡ ለምን አበን ጀደን ምን ግም እት ግም እንዴ ልትወረስ ወልትሐላለፍ ለመጽእ ቀዋኒን አክል አዩ ውኩሉ ሀሌ፡ ቃኑን ውርስ ዓዳት መጅተማዕ ኤረትርዮ ሰበት ገብእ፡ ምን ዕሉን ወሳይቅ ቃኑን ወአፍካር መክሐደ ወቅራመት እንዴ ሪምኩ፡ እግሉ ቃኑን ለለኦታምም ወለከምክም፡ ተዋዋር ናይለ መጅተማዕ ለለሐብር እግል ልግባእ ወጅቡ። ዲብ ሰነት 2021 ለወዳኖህ ጌማም ናይለ አሰክ እለ ነአትዮም ለጸንሐኩ እትሉም መባእድ እሉም ለትነደቀው ቶም ሚኢኮን፡ ሚንዋቅሰ ሀለ እግሉም፡ ሚእግል ነአትምም ዲባም እንቀድር፡ ለልርኤ ዐለ። ምን ሐረስ እሊ፡ እበ ሐቱ ጀህት ምነ እተ ዶል ለህ ለትረከበ ተጃርብ እንዴ ትካእለለ ለመጽእ ወዲብለ ማሕበር ጎማት

ለዐለት መሻረከት፡ እተዩ ደረጃት ባጽሓም ክም ህሌ፡ ወሳይቅ ሚመሰል፡ አሳሰ ዓዳትነ ወነባሪን ላቶም ተእሪክ ረዩም ለም፡ ታክያት ነባሪን ወዓዳትነ ላቶም፡ ቃኑን መጅተማዕነ ወሄራር ዐማርነ ለተምትሞ ከብት ወሳይቅ ታዩን። እብ እንክር ብዕድ እግል አተላላይ መጅተማዕ፡ ከሊቅ ውሕደት ወመቅሬሕ ሕበር ወደማነት እት ኖሰ ለለፈርዮ ረኤ። ደማነት ዲብ ኖሰ እብ ክምኩም እብ ደረጃት መጅተማዕ ወእብ ደረጃት ወጠን ሚ ክምሰል መሰል፡ ነባሪን አክል አዩ ሻርሓው ወዲብ ፍዕል እርኡያው ህሌን እግል ንኣምር ሰዴ። ክምሰለ ዲመ ለእምብሉ ዐዳለት መብዳእ ገብአት ምን ገብእ፡ ቃኑን ህዩ ውርስ ዓዳት አሰልቱ። እሊ ውርስ ዓዳት እሊ እብ ለገብእ አሰባብ እንዴ ኢበሌ ወለኢልትመሳሕ፡ ሕሸመቱ እንዴ ተአከደት ወተሐፈዘት ምን ጂል ዲብ ጂል እግል ልትዐዴ ቡ። ዲብ ከሊቅ ጅንሰየት አውመ ወጠንየት፡ ዲብ አከዶት ሐቅ፡ ዋጅባት ወመሰልየት መዋዋን እት ፍዕል እግል ልውዐል ሰበት ወጅቡ፡ እሊ ቃኑን እሊ ሚ መሰል እንዴ እምቤ እግል ንፈትሹ ወንርአዩ ጅሩግም ዐል። ሰበት እሊ ነባሪ እምብል እንዴ ህሌን ምሰል ዐዳለት ወሕርየት ናይለ መጅተማዕ ወእግል ኩሉ መክሉቅ ናይ ሕበር ውርስ ነባሪ። እለ ናይ ሕበር ውራሰት እለ ሳኪን እግል ትትአኩብ ወትትሐፈዘ ሰበት ለአሰትህሉ፡ ክም ክሉ ዲብ ሐያት መንበረት ወዋጅባት እጅትማዲ እት ሕድ እንዴ ትቀረነ ክም ገይሰ ወእግል ልትመም ዲቡ ለቡ ጋራት ክምሰል ሀለ እግል ነኣምር ብኸ። እሊ ዲመ መራዐየት ተአትሐዘዩ።

ዓፍየት መዋዋን ዲመ መራዐየት ተአትሐዘዩ፡ አምር ወዕልም ናይለ መዋዋንም እተ ክምሰልህ፡ ምሰለ ነባሪ ውራሰት እንዴ ትቀረነ ለገይሰ ዋጅባት ህዩ ሀሌ። እብ እንክር ብዕድ ህዩ፡ አዳም እግል ልምበር ለለኦትሐዘው አሳሰዩን ሓጃት እግል ልአክብ ነባሪህ ቱ። ክምሰለ እምብሉ ለጸንሐነ መክሉቂን ሰበት ሕክ፡ እግሉ ውራሰት ናይ ሕበር እብ ክምኩም፡ አውመ እብ አንፋር፡ ዓይላት፡ ኮም፡ ማዕዩ፡ መጅተማዕ ወወጠን እንዴ እምብል ሰበት እንገይሰ፡ ለነባሪ እት ፍንጌ እሊ ለትሸርሐ ክፋላት መጅተማዕ ለህሌት ዕላቀት ሸሬሕ። እሊ ነባሪ እሊ እት ረአሰለ ሳብተት ታክያቱ እግል ልትነደቅ ሰበት ለአሰትህሉ፡ ጌማማት እግል ኒዴ ወምን መጅተማዕ በሊሰ እግል ንርኩብ እንዴ ትባህሉ፡ እለ አዜ እንቀድመ ለህሌነ ሳምን ቃኑን፡ “ቃኑን እግል ሕሸመት አዳም ወዐማር” ሐንቲለ ትብል ስቅራት እትብገሳም ህሌ። ምነ ለሐልፈ ተጃርብ ለረኤናህ፡ ለወቀዋኒን እግልነ መሰል ገብእ፤

ሕነ እኩባሙ ለህሌነ ወሳይቅ እብ ተአሰትህል ዲብ ተእሪክ፡ ነባሪ፡ ዓዳት፡ ዓዳት ወጠነ ራቱዕ ለአተንክበ ወምኑ ለልትብገሰ ጋብእ ሀለ፤ ናይለ ልብል ሰኣላት በሊሰ እግል ንርኩብ፡ በሐሰ እንወዴ ህሌ። መጅተማዕ አተላላይ ሰበት ቡ፡ እሊ ነባሪ ውርስ እሊ አጅያል ምን ሕድ እንዴ ልትዋርሱ እግል ሊጊሶ ሰበት ለአሰትህሉም፡ ዐቦቶም ለሸሬሕ እግል ልግባእቡ። እምበል አሳሰ ነባሪ መጅተማዕ ለትመጽእ ዐቦት ወተጠውር አለቡ። ምን ሐረስ እሊ ለዲብ ነባሪን እጅትማዕየትነ ለለኦትንክብ፡ አተላላይ ናይ መጅተማዕ ለለአክድ፡ ሐያትነ ወመንበረትነ እብ ለሐሰት ወለጠፍሐት ገበይ እግል ንምረሕ ለለኦቀድረ፡ ለእት ፍንጌነ ለህሌት ዕላቀት መዓወነት ወሰዳይት ሕድ ለከምክም ዕላቃት ቱ። እሊ እብ ከአፎ እንዴ ተሓበረ ገይሰ ወሕድ መሰል እንዴ እምቤ፡ እግሉ ነባሪ ቃሊ ዝያደት ደማነት ክም ተህሌ እግሉ እንክድም ህሌ።

መጅተማዕ ወደማነት መሰተቅበሉ፡ ምሰል ሕሸመት ወነባሪ ናይለ ገበል እግል ልትመሳሕ ወልትመቅረሕ ሰበትብ፡ እተ ለሐልፈ ወቅት ምሰል ወሳይቅነ ወምሰል ሩእየትነ ወእሰትራተጅየትነ ጸብጣሙ ጸነሐኩ፡ እተ ለነህይቡ ከደማት ለሀለ ነዋቅሰ ሚ ክምቱ እግል ንፈርግ ጅሩግም ዐል።

ለካልኣይ ወዲብ ደንገበ



ለመጽእ ጋር፡ ምን ኩሉ ክእሉል ለረክብናህ፡ ለቃኑን እግልነ መሰል ሀለ ሚኢኮን፤ መጅተማዕነ፡ ነባሪ፡ ዓዳት፡ ተእሪክ፡ ውሕደት እጅትማዕየት፡ ወሐዮት ዓዳትነ መሰል ወወክል ሚኢፋሉ ባሐሶት ቱ። እሊ ነባሪ ሳኤሕ እሊ እግል ኢልክሳሕ፡ እግል ንዳፌዕ እግሉ ወንዕቀብ፡ ምን ወቅት እት ወቅት እግል ነአትሓይሱ ወነአውርሱ ብኸ። እሉ እንዴ ጸብጠ ለወርስ ወለለአወርስ አጅያል፡ ምን እሊ መባድእ እሊ እግል ልትብገስ ወጅቡ። ሄራር እሊ ካድም እሊ ከአፎ ክም ሀለ እንጌምም ጸነሐኩ ወህሌ። አዜመ እትሊ መብዳእ እብ ውሕደትነ እጅትማዕየት፡ ዐዳትነ፡ ነባሪ፡ ዋጅባት ወሐቅ ወጠኒ ዲብ ወግም እንዴ አተ፡ ማሌ አጅያል ሕድ እንዴ ወርስ

ወለሀይክ ለሀይ እንዴ ለአትዐርፍ ለመጽእ፡ አተላላዩ እግል ልትአከድ ቡ። ዋጅባት ወጠኒ ዲብ ነድቅ ወጠንየት፡ ብኸእ ዋጅባት ወጠኒ፡ ወዲብ ፈዓልየት ሄራር በርናምጅ ዐማር ኩሉ እብ ሕበር ሕድ እንዴ አግመለ ዲብ ነባሪ እግል ልትከምከም ቡ። እሊ ዲብ መዳፈዐት ጀራይም ወአደቀቦትለ ነባሪ ናይር፡ ተረት እግል ተህሌ እግሉ እንዴ ትባህሉ፡ እምበል አትካራም እንወድዩ ለህሌነ ጅህድ ወጌማማትቱ።

እሊ ናይ ዮም ዓመት ዋዕላመ ሀደፋ ምነ እት ሰነት 2021 ለገብእ ማሕበር ጎማት ሳምን ቃኑን ለልትፈንቱ ኢኮን አተላላይ ናይቱ። እግል ነኣምረ ለብኸ፡ ለነባሪ ውራሰት ለእምብሉ ሰኒ ረቂቅቱ፡ ዲብ ለገብእ ልግባእ ወቅት ኢበሌ ወኢልትመሳሕ። ምን ግም እት ግም እንዴ ልትዐዴ ነብር ለጸንሐ ነባሪ ቃሊ፡ ምን አብዕቦታትነ ለወረሰናህ፡ ቃኑን ወንዛም መንበረት ምሰል ለለአምር ወለለሐሸም፡ ዲብ ተእሪክነ ወናይ ቃኑን ነባሪ፡ አምኦት ሰነዋት ለወዳ ነባሪ ሕሸመት ሕድ ለመልክ መጅተምዕ ብኸ። ከእሊ ቃኑን እሊ ምን ወቅት እት ወቅት እግል ልትሓየሰ ሰበትብ፡ ሐቱ ምሰሉ እግል ንትዋፈቅ ወካልእመ እግል ነአትሓይሱ እንክድም ጸነሐኩ። ከለ ዋሳይቅ ክም ረኤናህም ልሳዕ እግል ልትሳሕ ለቡ ብዘሕ ክም ሀሌ፡ መጅተማዕ እግል ለአምርም

ክሉም ዲብ ነባሪ መጅተማዕ ለአተንክበው ቶም። ለፋይላት ኩሉ ቅዱም ሀሌ። ለቀዱሙ ለህለው ሸባብ ህዩ፡ ምሰለ ለህሌት ሓለት ሓድረት ወለነባሪለ መጅተማዕ እንዴ አትጸበጠው እግል ልርአው ወለአፍይሕወ ወዝያደት ምን መጅተማዕ አፍካር ራቱዕ ወሴድያይ እግል ልርከቦ እግሉ ቱ። እሊ ክም ረክብከ ሐሬ እተዩ ደረጃት ክም ህሌ፡ ለናይ ዐማር መቀየሲና ሐድ አክል አዩ ለለአደምዕ ክምቱ፡ ምሰል ነባሪን እንዴ አትመጣወርነ እንርእዮ እንዴ ህሌ፡ ገሌ-ገሌ ድራሳት እግል ልግባእ ገበይ ለፈቱሕ ምስዳራት ልትነሳእ ሀሌ። እብሊቱ ለ“ግድላነ ግድለ አጅያልቱ” ለምብል።

እሊ ሰበት ገብእ ለአወላይ ግም እግል ከሊቅ ወጠንየት ወመሰኡልየት አሮት መዋዋን፡ ረዩም ለሄርር እቡ ለጸንሐ ጸር ምርካብ ሕርየት፡ አከዶት ዐዳለት፡ ቃኑን ወንዛም መጦር ነባሪለ መጅተማዕ ደማነት ክም ረክብ ከዲም ቱ። ህቱ ህዩ፡ ዲብ ሙአሰሳት ለረከዘ ሌጠ እንዴ ኢገብእ፡ ክም ዐላይም ወመፈረገ ናይ መጅተማዕ ኤረትርዮ ሰበት ገብእ፡ ምሰለ አዋጃት ወወሳይቅ፡ ለመጅተማዕ ሄራሩ ምሰል ለህሌት መርሐለት እንዴ ቀርነዩ ለሸቂ ዲቡ ሰበት ገብእ፡ ለአወላይ ጂል ሕርየት ወጠን ወወጠንየት ሐቀለ አከደ፡ ዲብ ዐቦትለ መጅተማዕ፡ ጅንሰየቱ፡ ወዓዳቱ ወነባሪህ እንዴ ለአክድ መጽእ።

ለካልኣይ ጂል ህዩ፡ እግሉ ለዐለ ጸባይብ ወተረርፍ እስትዕማር እንዴ ነሐ፡ ለተኡተነ በርናምጅ ዐማር እብ ዐውቱ እግል ለአትምም፡ ከድም ለጸንሓቱ።

ለሳልሳይ ጂል ህዩ፡ እብ ክሉ አሸናኩ መቅደረት ካፍየት ለቡ፡ ምህነት ለመልክ፡ መትሳባል፡ ደማነት እት ኖሰ፡ ክምሰሉሙ ኩሉ ለከምክም ነባሪ እንዴ ሐጠጠ፡ ለመሰኡልየት ወጠንየት እግል ለአትምም ዲብ በርናምጅት ዐማር እንዴ ትጸመደ ሸቂ ለሀላቱ። እሊ አሳዳር እሊ ህዩ እግሉ ናይ ቀበትነ ሄራር፡ መቅደረት ኖሰ፡ መብዳእነ ሕጡዋ ረአሱ ቀደም እግል ለአሸክቱ እብ ክለ ሐለቱ ወመቅደረቱ ከድም ለጸንሐ ለሳልሳይ ጂልቱ። ለፈጅር ንትጸበረ ለህሌ፡ ምሰል ድዋርነ ወምንኬኑ ለትትጃገር ዐቦት እግል ተህሌ እግል፡ ለትወቀለት ምህነት ለቡ መጅተማዕ ክም ልትብኤ፡ ምሰለ ኩሉ ህዩ እግል ወጠነ ጅብት ሕሸመት እንዴ አሰመደ እግል ልሸቂ ለትብገስ ሰበት ገብእ፡ እብ ፍዕል ለአከደዩ ነባሪ ሐበን ደማነት ክምተህሌ እግሉ እንዴ ወዴ፡ ምን እለ ወሐር እበዩ መርበይ እግል ነሄርር እንቀድር ለልብል ሰአል፡ ዓመተን ናይ ሕበር ፈሀም እግል ለህሌ እግልናቱ ለሀደፍነ።



መዳሊያዬ፤ መሓሪ ፍሰሃጽኖን ተርጀመት፤ ሳልሕ ገመ



እትሊ ወክድ እሊ ፕላስቲክ ሰብብ አሳሲ ክሰሔ በሐር ጋብእ ሀለ። ፕላስቲክ ምነ እግል ለትፈናተ መናፊዕ እንዴ ትበሀለ ለልትሸቄ ዲቡ መሳኔዕ ክም ፈረ። እብ ለትፈናተ አግቡይ ዲብ በሐር ለኣቲ ወእብ አምዋጅ በሐር ወውልዋል ዲብ ለትፈናተ እትጅሃት እዲነ ዲብ ለህለ ኣብሐር ወምሒጣት ገይሱ። እብሊ ህዩ። አሰክ ዲብ ለቀ'ረ ወለ ፊመ ክፋላት ኣርክቲክ ክምሰልሁመ አሰክ ለቀረ ክፋል በሐር ፍንጡር ሀለ።

እትሊ ወክድ ጎነ ናይ ፕላስቲክ ክሰሔ በሐር ዲብ ሕያዖም ወድዋር ለሰብበ መደረት ወእግል ለምጽኡ ለቀድር ንቁስ ዲብ ወግም እንዴ ኣተ። ሰኒ ለተኣስፍ ብቐት ለሰብብ ሰበት ቲ። እግል ዐለምነ ተህዲድ ዐቢ ጋብእ ሀለ። ሰበት እሊ። ምን ለትፈናተ ሙጅተምዓት፤ ሕክማት ወዳርሳም እህትማም ዐቢ እንዴ ተህዩቡ። ሀመት እድንዩ እግል ልግበእ ቃድር ሀለ። ክም መሰል። እትሓድ ኣሮቤ መሰኡሊን መጅሙዐት-7፤ ናይ እድንዩ ሙነዝመት በርናምጅ ድዋር (UNEP) ወብዕዳም ሕሱራም ወመትጸገት፤ እግል ድዋር ክም ኣርእስ ምህም እንዴ ሀረሰው ልትጸገም ሀለው።

ዓገት ክሰሔ ፕላስቲክ ምነ ኣድቲ?

ፕላስቲክ እትለን ለሐልፊያ 50 ሰነት ክም ዐፍሽ እግል ልሽብብ ኣንበተ። ሐቐ እሊ ፕላስቲክ ለሸቄ መሳኔዕ እብ ተካሊፍ ሐድ ብዘሕ ፕላስቲክ እግል ለኣፍሬ ጅግረ ወደ። ክም ነቲጅቱ ህዩ። ዲብ ሰነት 2014 ሌጠ 311 ሚልዮን ቶን ፕላስቲክ ፈረ። እሊ ምን ናይ ሰነት 2013 እብ 4 ምእታይት ወሰከ። ፕላስቲክ ዲብ ለትፈናተ መናፍዕት ለልውዕል ዲብ ገብእ። ክም መዐሸጊ ነብረ። ዲብ ኣላት ብኩ። አውቶሞቲቭ። ኤሌክትሪክ ወኤለክትሪኒክስ ወዲብ ወራታት ሐርስ ክምሰልሁመ። እግል ኣድውዮት ከድም ሀለ። እግል መሰል። ምን ኩለን 28 ደውለት እትሓድ ኣሮቤ ጀርመን 24.9 ምእታይት፤ ኢጣልያ 14.3 ምእታይት፤ ብሪጣንያ 7.7 ምእታይት፤ ወስፕይን ህዩ 7.4 ምእታይት ፕላስቲክ ለኣሰተህልከ።

አሰክ ዮም ብጾሕ ለህለ ድራሳት ክመ ለኣሸፋ 80 ምእታይት ናይ ፕላስቲክ ክሰሔ ምስል ኣርድ ለልትጸበዋ ማዳት ለልትሸቄ ቲ። ለተርፈ 20 ምእታይት ህዩ። ምነ እት በሐር ለህለ ኣሸቃል ለፊሬቲ። ምናተ እብ ሰበት ዒማት ምን ኣርድ አሰክ በሐር ለልኣቲ ፕላስቲክ ዋዴሕ

አምር ወሐብሬ ምንመ ኢሊህሌ፤ ፤ ፕላስቲክ አሰክ በሐር ለልኣቲቡ አግደ አግቡይ እሊ ተሌቲ።

- እምበል ቃትን ለገብእ ከዐይ ግማመት ወኢህለዮት ካፊ አምር እዳረት ግማመት
- ወራታት መሳኔዕ
- ኢባቕዕ ኦጫረዮት ማይ
- ከዐይ ግማመት ፕላስቲክ ዲብ ግንራራብ በሐር

- እብ ወሓይዝ ወኣንሃር
- ምን ቅያስ ወለዐል ምልኣት መጃሪ

- ብቐት ጠቢዐት
- ወራታት ጀለቦት ዓሰ
- ምን በዋቢር ዐባዩ ለልትለከፍ ፕላስቲክ
- መኣሰሳት ተዕዲን
- ብቐት በዋቢር ወብዕድ ቲ።

ምን ዕሙማይ ብዝሐ ሸዐብ ዐለም ለሐድ 2 ቢልዮን ንቁስ እዳረት ግማመት ይብሰት ክምቡ ለትፈናተ ተቃሪር ለሐብር። እብ ሰብብ እሊ ንቁስ እሊ ህዩ። አሰክ በሐር ለልኣቲ ፕላስቲክ እብ ብዝሐ ወትዕዮት እብ ዕጽፍ እት ዘይድ አሰክ ለትኣስፍ ደረጀት ገይስ ክም ህለ ልትሐበር። እብ ቅባል እሊ። እት በሐር ለኣሳሱ ክሰሔ እብ ገብእ ለህለ ራቀቦት እት ለሐይስ ገይስ ክም ህለ ልትሸረሕ።

አንወዕ ክሰሔ ፕላስቲክ

ናይ ፕላስቲክ ግማመት እብ ለቡቱ ሸክል ዲብ ኣርበዕ ልትከፊል። ህቲ ህዩ። ሰኒ ወኣማን ዐቢ። (mega-plastic)፤ ምኡ ሸበህ ለልንእሽ (macro-plastic)፤ ወቅያሱ አሰክ 5 ሚሊ-ሜትር ለበጹሕ ምግባይ ቅያስ ለቡ ፕላስቲክ (micro-plastic)፤ ወለነኣሽ (nano-plastic) እንዴ ትበሀለ። እብ ዕንክ እግል ልትርኤ ምነ ለቀድር ኣሰክል እብ ሰዳይት መርኣዩ ማይክሮ-ስኮፕ ሌጠ እግል ልትርኤ ለቀድር ሀለ። ናይ ፕላስቲክ ግማመት ሐቲ እምርት ወልምድት ሰሚት ምንመ ኣለቤ። ለትመጽኦ መደረት ላኪን ምስል ሸክለ ወግዘፈ ለትጸበዋ ቲ። እብ ሸክሉ ለትትህየቡ ሰሚት ህዩ ሰኒ ምህም ትወድዩ።

ዲብ ማይ እት ሰቤ አው ሰለል እት ትብል ለትሄርር ግማመት ክም ከባደተ ወሸክለ ወብዕድ ለትፈናተ ዲቡ እንዴ ኣተንክብኩ። ምን ገሌ ሐድ ደቃይቅ አሰክ ሰናታት እት ረኣሰ ማይ ሰለል እት ትብል እግል ትጽንሕ ትቀድር። ምን እለ ዲብ ለዐል ለትሸረሐት ጅንሰ ግማመት-ፕላስቲክ ናይ ሐቲ ሚልዮናይት (nano-plastic) እብ ዕንክ እግል



ትትርኤ ሰበት ኢትቀድር። እግል ኣዳም ወብዕድ መክሉቅ በሐር ሰኒ ዴራይት ክምተ ህዩ ፍገሪት ናይ ለትፈናተ ብሐሳት ተኣርኤ።

ግማመት ፕላስቲክ። እት በሐር ክም ኣቲት እብ ሐድ-ሐድ እት ትብሌ ወትትህተክ ትገይስ ወዲብ ለነኣሽ ቀረርጭ ትትበደል። እት ትንእሽ ክም ጌሰት ህዩ። ምስል ብዕድ ኣሸዩእ እት ትትሓበር። ሕበርበር (Compounds) ዲብ ትከልቅ ወኖዕዮተ እት ትብድል ህዩ። ዲብ ለትኬለመ አሰማም ትትቀየር። ለዲብ ህለ ጽበዋ ካርቦን ምስል ማይ ሐብር እተ ህለ ማዳድን እንዴ ተሓበረ እብ ብዝሐ ካርቦን-ዳይኦክሳይድ ፈዋር። ምናተ እብ ጠቢዐቱ ጩወ ላቲ ማይ በሐር እግል ናይ ኣንኣሾት እግቡይ ምነ ጠቢዒ ወኪን ሰኒ ለኣነቅሱ። ሰበት እሊ። እተ ሰቤ ለህለ ፕላስቲክ ኣራዌሕ ለም መክሉቃት እብ ብዝሐ እግል ልስኩት ወክድ ረክብ። እሊ ህዩ። እግል ናይ ፕላስቲክ ግማመት ሚዛን እንዴ ኣወሰከዮ ተሐት ተውቅ። እግል ኣትናኣሽ ሰበት ሰድዮ ህዩ። ዲብ ማይ ብዘሕ ወክድ ክም ትከልእ ወድዮ።

መትመዳድ ማይ ግማመት ፕላስቲክ

ናይ ማይ ክፋል እዲነ ሐድ 71% ምን ዕሙማይ ርሕብነ ወጅህ



ምድር ለከምክም ሐድ 4 ኪሎ መትር ቆሪነ ማልክ ልትረክብ። ዲብ ሸቁል ብሐሳት ግማመት ፕላስቲክ ተሓዲ ዐቢ ገብኣት ሀሌት። ብዝሓም ባሕሲን። ናይ ፕላስቲክ ግማመት ለልትረክብ ዲቡ ክፋል እዲነ ለሐብር ሀለው። ምናተ ዎሮ ለትከምከመ አግቡይ ድራሳት ግማመት እብ ኢህለዮቲ ዲብ ለትፈናተ ኣነናት ለህሌት ግማመት እግል ትቀየም ለልትቀደር ኢኮኒ። ምናተ ለእብ ብዝሐ ግማመት ፕላስቲክ ለትረክብ ዲቡ ባካት እዲነ ፍሩግ ክም ህለ ለሐብር።

እብ ሰበት ናይ ፕላስቲክ ግማመት ብዘሕ ድራሳት ጋብእ ምንመ ሀለ። አሰክ ዮም እብ ገበይ ሰኔት ድራሳ ለህለ ኖዕ ግማመት ፕላስቲክ ለጸንበለል ለትብል ግማመት ቲ። ኣምዋጅ ወውሓይዝ በሐር ህዩ ዲብ ሐረኩት ወንሸረት ግማመት ለኣግደ ክምቲ በሕሲን ለሐብር። ዲብ ሰነት 2010 ሌጠ ብዝሐ ዲብ በሐር ለኣተ ግማመት ፕላስቲክ ምን 4.7 ኣሰክ 12.7 ሚልዮን ቶን ክም ዐለ ለድራሳት ለሐብር።

እኩይ ተእሲር ግማመት



ፕላስቲክ

እኩይ ተእሲር ክሰሔ ፕላስቲ እት ድዋር ወሐዋናት እት በሐር ወምሒጣት ልትረኤ ሀለ። እምበል እሊ። እብ ወድ ኣዳም ጀሬ ዲቡ እብ ህለ ደቅዋ። ወሰኩት ኣሲድ ወሐፋነት። ወሰኩት ካርቦን-ዳይኦክሳይድ። ክሰሔ ለኣኬ ወክቡድ መደራት ሳድፍ ሀለ። ዲብ ምሒጣት ፍንጡር ለህለ ናይ ፕላስቲክ ግማመት ዲብ ድዋርነ ወዲብ እጅትማዒ ወእቅትሳዲ ቲለልነ ወክለ ዐለምነ መደራት ክቡድ ሰብብ ሀለ። እብ ሰበት ቅያስ ወመትመዳድ ግማመት ፕላስቲክ ወተለውስ በሐር እብ ዕሙቅ ምንመ ኢትወደሐ። ዲብ ኣብሐር ወኣብያት ጀርቤ እሊ መስል መዕሉማት ርኩብ

ቶም። ምናተ ለበዝሐ ግማሞታት ፕላስቲክ ዲብ እሊ በካት እሊ እንዴ ትገሐፈ ሰበት መጽእ። ጠቢዕያይት ግርመት ናይለ በካት ለኣከርበ ወለኣነቅሱ።

- መሻክል ዲብ ሰፈርያት በሐር። ክም ፕላስቲክ ለመሰል እንዴ ደራረብ ኣላት መጀለቢ ዓሱ ግማመት። ዲብ ሄራር ቀበት በሐር ወብርሲታት በዋቢር እት ልትጠበለል መደረት ክብድት ለኣጀሬ።

- መሻክል ዓፍዮት ዲብ በሐር ለልሕንብሶ ወለተውቁ። ዲብ በሐር እንዴ ትለከፈ ለልትረክብ ግማመት ፕላስቲክ ዲብ ዓፍዮት ውላድ ኣዳም መ ሰኒ ክብድት መደረት ለኣጀሬ።

አግቡይ ኣንቀሶት መደረት ግማመት ፕላስቲክ

እብ ለህለ እሊ መተራድ ወእብ ቀላለ ለልትረክብ እብ ግብኣቲ። ኣብጠርት መትነፍያት ፕላስቲክ ዲብ ሐጫር መደት እግል ልግበእ ክቡድቲ። ዲብ ለትፈነተ ወሳእል እዕላም ትሩድ ተዕቢኣት ዶል ገብእ ላኪን ሰኔት ነቲጀት እግል ትትረክብ ምኡ ትቀድር።

መትነፍያት ፕላስቲክ እግል ኣንቀሶት ወኣብጠርት እሊ ለተሌ ኣግቡይ ኣተግጠርት ልትቀደር።

- እብ ሐዲስ እት ንትነፈዕ እቡ ኣውመ እብ ሐዲስ ክም ልትሰነዕ እት እንወዴ ራቲዕ ኣግቡይ መትነፍያት ኣትኣታይ (Re-use and Recycling plastics)

- አምር ሙጅተማዕ እግል ልዕቤ ለትፈናተ ሐብሬ ሂበት (Aware-ness Raising)

- ዲብ ክሉ በካት እብ ለቀለት ገበይ ለሸቄ ወግማመት ካልእ ዶል እንዴ ሸቁክ ዲብ መንፈዐት ለትውዕል እቡ መኣሰሳት ኣዳለዮት።

- ለልትገፍ ፕላስቲክ ዲብ ኣካት ዲብ እንቲ እንዴ ኢልትፈንጠር ራቀባቲ።

- ዲብ ካልእ ዶል ሸቅየት ግማማት ፕላስቲክ ትሩድ ብሕሰ ውድዮት።

- ተጠውር ተክኖሎጂ እትኣታተዮት።

- እብ ቀላል ገበይ እግል ልመሽምሽ ለቀድር ፕላስቲክ ጠወርት (Biodegradable plastic)

- እብ ክሰስ ክለ ግማመት ዎሮ ቃትን ትሩድ ኣዳለዮት።

ሸባብ

ዶ/ር ዐብነት ዐብነት



ምህም ንቃጥ ለሕግ ደረሰ ሕግ ስራ



ሀ. ባቄታ ከሞት ወቅት ሀላፊነት ምር ደረሳይ እት ክል ምዕል ኤታን ናይለ ለአገደዮም ሓጃት እት ህለ እግሉ፡ እብ ሰብብ ኢህለዮት ዋዴሕ መባዴሕ፡ ህኮት፡ ሰደ ለሐልፊት ፈተ ትልህዮ ውብዕድ አሰባብ እት ድራሰቱ እግል ልሕመቅ ቀድር። ሰበት እሊ ኤታንን እብ ዋጅብ እት ዐመል ልተርጀም ክም ህለ እግል ነኣክድ ብክ። እግል መሰል፡ እግል ሕፈዝቱ እንዴ ትቤ አካን ሕፍዝ እንዴ ግሰክ እምበል እንትብህ ቅርኣት ወሚ ጸበዋክ ኢጌመዋት አው እት ምግብ ሕፍዝክ ምስል መልህምክ እብ መትሃጃክ ወቅትክ አብደዮት ምስል ወቅት ለሰብብ ፈሸል ክቡድ ቲ። ብዕድመ እብ ኤታንክ ግሰክ ወሐፈዝክ እግል ትትብህል ኢልትቀድር።

ለትዘረኣት ዘርእ እግል ትዕቤ ወትግመል ገኣት ምን ገብእ ሸፍር፡ ራዐዮት፡ ማይ ወእት ለትፈናተ ወቅት ርእየት ወጌምም ለአትሐዝዩ። ደረሳይመ እት ክምሰልሃቱ፡ እግል ልፈድብ ገኣ ምን ገብእ ክል ምዕል እግል ልቅረእ፡ ልትሰኣል፡ አክትብት ልቃይር፡ ነፍሱ ለአትምትሕን ወልጌምም ለአትሐዝዩ። ክእኒ ለኢወደ ደረሳይ ህዩ ምስለ ተለዩ ውሒዝ ሰበት ገይሰ ክም መርበይ ለአለበ ጀልበት ሰለል ሌጠ ልብል ወለበጽሑ መባዴሕ አለቡ።

ሀ. እብ በርናምጅ ጊሳት
ደረሰ እግል ልትዐወቶ ገኣው ምን ገብእ፡ ክሉ ወራታዮም እብ በርናምጅ ወኤታን ውድዮት ምህም ቲ። ክል ደረሳይ ለህለ እሉ ሸቅል ቤት፡ ፈሰል ፕሮጀክት ውብዕድ እት ለአፍገረዩ እሉም ወቅት ወኤታዮም አትመመ ምን ገብእ፡ ለበዝሐ ወቅት እግል ልትዐወት ወፍሬ ለህቡቱ ለኣቱ ለህለ በክት ዐቢ ቲ። ወቅት ሐቲ ዶል ሐቅ ሐልፈ፡

እግል ለዐቅብል ለቀድር ኢኮን። እለ መሰል ናይ ሰኖታት በርናምጅ እት ለቦም አንፋርመ ተአሰር ቡ፡ ምስዐል ክሉ ላኪን እት ደረሰ እብ አማን ትተርጀም። እግል ሚ ምን እንብል፡ ደረሰ ክል ምዕል ለእት ፈሰል ደርሰዉ ምሴ ቤት ክም ጌሰው እግል ልቅርእዉ ሐቅ ኢሰተተው፡ ፈጀራት እት ለልትህዩም ሸቅል ፈሰል ሰኒ ኢሸቁ። ክል ምዕል ቤት ክም ግሰክ እግል ደረሰካሁ ሐፊዝ ወደጊም እግል ፈጅር ለደርሱ አርሰ ሰኒ አሳሰ ቲ። እት ሳምን፡ ሰር ሰነት፡ ሰነት ውብዕድ ላዝም ክምኩም ደጊም ናይለ ሐለፍናሁ አርእሶታት እግል ንውዴ ወጅብ።

ሐ. ክሉ እንትብህክ እት መድረሰት ወዲ

እት ፈሰል፡ ምደርሰ እት ሸፊሕ ወለአደርሰ፡ እንትብህክ አሰኩ እግል ልግበእ፡ ወክል ለትፈግር ክሊመት እግል ኢትሕለፈክ እግል ትትሓፈዝ ወጅብ። እት ፈሰል እንትብህክ ለሰርቅ ሓጃት ክም ከረ መትሃጃክ፡ በረ ርእየት፡ ሞባይል መትነፈዶት፡ ምስለ ሕሰት ለኢገይሰ ክትብ ወከራረሰ ርእየት ምኖም እግል ንትሓፈ ለአሰትህል። ብዕድ ምደርሰ እት ሸፊሕ ሰሜዕ፡ ሐቲ ወቅት እት ሰሜዕ ወትርኤ ናይ ፍሂም መቅደረትን ለዐቤ። ምን ምደርሰ ለእንረክቡ አምር አሳሰ ናይለ ሐር ለእንፍህሙ ደርሰ ወዲመ ለትነፈዱን ድራሰት ሰበት ገበኣ፡ ምስተቅበልክ እግል ልሰኒ እት ፈሰል እንትብህክ ክሉ እግል ምደርሰክ ነህቡ።

መ. ክሉ ኣላት መድረሰትን አሰክ መድረሰት ንሰኣት ወመትሓፋዝ እቶም

ክም መስጠረት፡ ኮምፓሰ፡ ክትብ፡ መሳሐት ውብዕድ ምህም ኣላት ናይ ደረሳ ቶም። እሉም መሻቀዶታት እሉም ናይ ፈሀም

መቅደረትን እግል አዜዶት እንዴ ትባህለው ቲ ለልትህዩቡ። እግል ኢልክርቦ ንትሓፈዝ እቶም፡ ሰበቡ እት ንዋያት ሐርሱ ለኢትሓፈዘ፡ ወንዋያት ለአለቡ ሐረስታይ ሌሐተ ክም መጸኣት እግል ልሕረሰ ኢቀድር። ለኢሐርሰ ህዩ ቀይም ምን አርዛቅ ገርሀቱ ኢጃቅፍ። ደረሰ ህዩ ገርሀትን ዕልም ቲ። ምን ዕልም እግል ንጽግብ ወንትሐረብ ህዩ፡ አላት ድራሰትን እብ ዋጅብ ንጽበዋ፡ ንትነፈዕ ወነኣኩብ።

ረ. ለኢትፈሀመውን ሰኣላት መትሰኣል

እት ፈሰል ወምደርሰ እት ሸፊሕ ለኢትፈሀመውን ሓጃት፡ ምደርሰ ናይ ሰኣል በክት ዶል ለሀይበክ አው ሐር እት መክተቡ እግል ንትሰኣል ቀዳር፡ ምን ምህም እት መትዐዋት ሰኔት ተረት ለቦም ምስዳራት ተን። እሊ ሌጠ እንዴ ኢገብእ እግል ኢትፈሀመዝ እግል ትትሰኣል ቀዳር፡ ሰኣልክ እብ ግሩም ገበይ ናይ አቅረቦት ወአረእ ናይ ብዕዳም አንፋር ፍሂም ቅድረትን ተግብ።

ብዕድ እሉም እት ክል ምዕል እት ፈሰል ለመጽኡን ወኢትፈሀመውን

ሓጃት እት ልተኣከቦ አክለ ጌሰው እት ምስተቅበል እት ልትሓበለት ወከብዶ ሰበት ገይሶ፡ ናይ ድራሰት ሸንህትን እት ነቅሰ ክም ትገይሰ ወዳ። እት ፈሰል መትሰኣል ለአክጅለኝ ሐቅ ገብኣ (እግል መሰል ክም መኣንብተት) ምደርሰ እት መክተቡ እት እንቱ እግል ንትሰኣሉ እንቀድር። ብዕድ ለኢትፈሀመውን መትሰኣል ምስል ምድርሰክ ሰኔት ዕላቀት ክም ተሀሌ እን ወዳ።

ሰ. እት ሐቲ ወቅት ክሉ ሐጃት እግል ትውዴ ኢጀረቦት

ምክ ወድ አዳም ካሬ ዕርፍ ወመትፋግዖት ለአትሐዝዩ። እብ ድድ እሊ ምክን እምበል ዕርፍ እግል ረዩም ወቅት ሸቂ ግኣ ምን ገብእ፡ ናይ ዓፍዮት መሻክል ክም ከረ ጨቅት፡ ነቂሰ እንትብህ፡ መትረሰዮት ውብዕድ እግል ልሰብብ እትን ቀድር። ምር ደረሳይ ምልእት ላሊ ክታብ እባሁ

እግል ልሸምድድ ምንመ ጀርብ እግል ልትዘከሩ ለቀድር ሐድ ቲ። ሰበት እሊ ምን ልውሕድ እት ፍንጌ ሳዕት ሳዕት ዕርፍ እግል ንንሳእ ብክ።

መ. ጀግዐት እንዴ ገኣክ ሐፊዝ

ለኢትፈሀመዝ እግል ንትሰኣል ለነቅሰ ምኒን ጭመም እግል አትመዋት ወእንዴ ቀንኣኝ እግል ንሕፈዝ ሰዴ።

ልገበእ ደኣም ጀግዐት እንዴ ገኣክ ሐፊዝ ሐጃት እግል ንፍሀምም እምበል እግል ንሸምድዶም በክት ሰበት አለብኝ ለእግሉ ፈሀምክ፡ ቤትን አው ቤት አክትብት እንዴ ግሰኝ እግል ንሸምድዶ ወጅብ። ምስል ጀግዐትን ሰኒ ሰበት ትፈሀመዝ እግል ንኣዘም ምኑ ኢወጅብ። ሰበት እሊ ክሉ ወቅቱ እግል ነህቡ ወጅብ።

ሕፍዝ ክም አትመምኝ አሰክ 30 ደቂቅ አበደን እግል ንሰከብ አለብኝ። ለአሐፈዝናሁ ሐንገልኝ አሰክ ለአትጸብጡ እብ ካልእ ሓጃት መትፋግዕት ምህም ቲ።

ምክነ ወለነሰኡ ቅደስ ጣቀት (ካሎሪ)

ምክ ምር ስነት ሰብ ለበጽሐ ነፈር፡ እብ ዋጅብ ሸቅሉ እግል ለአግዴ ገኣ ምን ገብእ፡ ምን ሰማን አሰክ ዐሰር ሐምሰ ካሎሪ መቅየሰ ጣቀት ለአትሐዝዩ። እሊ ምስል አሰዑድኝ ለነኣሰኡ ዶል ነኣትጃግሩ፡ እብ እገርኝ እትለ እንገይሰ እቲ ወቅት ምን አርበዕ አሰክ ሰባዕ ካሎሪ ነሰኢ። እብ እደይኝ እግል ንሸቂ ልግበእመ ንዝበዋ ወሰ እትለ እንብል እቲ ወቅት፡ ሐምሰ ካሎሪ ነኣብዴ። እብ ድዱ እትለ እንቀርእ እቲ ወቅት ሐድ ዐሰር ሐምሰ ካሎሪ ንትነፈዕ/ነኣብዴ።

ምክነ እብ ኒውሮንስ ለልትብህሉ ሴላት ለትብኝ ቲ። እሉም ኒውሮንት ህዩ ምስል ብዕዳም እሉም ለመሰሉ ሴላት እንዴ ትራከበው ሐብሬ ምን ወአሰክ ክፋልት ገርብኝ ለአትሐላልፎ። እምበል እሊመ እሉም ኒውሮንስ ኒውሮትራንስሚተርስ ለልትብህል ቀመም ሰጦ። እሉም ጅንስ ቀመም ህዩ ሐብሬ እብ ዋጅብ ወእንዴ ኢትነቅሰ እት ሓለፎት ዐባይ ተረት ለአገዱ።

እሉም ኒሮንስ ህዩ እግል ቀመም ኒውሮትራንስሚተርስ እግል አፍረዮት ሰብዓ ወሐምሰ ምን ምእት ናይለ ሐቅ ሸከር/ካሎሪ (ጉላክቶሰ) ልትነፈዶ እት ህለው ለተርፈ ዕሰራ ወሐምሰ ምን ምእት ህዩ ምን እት ደምኝ ለልትረከብ ሸከር ቲ ለነሰኣ እሉም ኒውሮንስ።

ሰበት እሊ እትለ ነሐሰብ ወእንፈክር እቲ ወቅት፡ ምክነ እብ ዋጅብ ሸቅሉ እግል ለአግዴ ካሬ ካሎሪ እግል ልርኩብ ወጅብ። በህለት እትለ ነሐፍዝ፡ ንትመራመር፡ እንክትብ አውመ እብ ናይ አምዕላይ መንበርኝ እትለ እንፈክር እቲ ወቅት ዝያድ ካሎሪ ክም ለአትሐዘኝ እንዴ አመርክ፡ ምክነ እግል ንመውት ወጅብ።



ተመህ ቀደር

9^ኛ ክፍል

ለካህን እብ ኩለ ርሐ አስተንፈሰ ወምን ክትርለ - ፈርሐት - ለንዮቱ ሐጭረት ወእግል ብካይ ትሰብሰቡ። ምናተ ሐር ለትትጸበሩ ህሌት ክርበት ወጅርሰት ፈቅደ። እብሊ ሰብ ቱ እግል መደቲት ሐጫር እት ኢኮን ብዙሕ ኢቀሰነ ወኢሰክበ። አሰክለ ጠረቤዘት ለኣብሪቅላ ፍደት ክሪት እት ዐለት እንዴ ረትዐ ከምን ማየ አሰክ ብሩድ ከበር ቅርጢዋ ገብእ ቀርደዐ። ወመደት እንዴ ኢወዴ አጭፋርለ እት ሐሹ ለኣቲት ቅወት ሰምዐ። እለ ቅወት እለ እብ ፍንቲይ እግል ጆኔታዩ ለኣሰክ እለ ምነ ከጠርለ ሞት እርዩም ይዐለ እግል ትቅተል ለመጽት ቅወት ዐለት።

ለካድም ሰኒ ርቡሽ ወፍጅዐ እት እንቱ እት ልሰዴ መጽዩ። ወሐቱ ቅወት ምን ሐረሰ ፈርዐን እግለ ሮሻን እንዴ ሓሰረቱ ለሽባቢኩ ወለ ባባቱ ተዐቅብ ክም ህሌት አክበረዩ። ወዎሮ ብዕድመ አሰር አሰሩ እንዴ መጽ ረኢሰለ ፍርቀት እብ ሽፋግ ለሐዘዩ ክም ህለ አሰኣለዩ። ለካህን ሐጠር ወሰባተት እግል ለኣርኤ ጀራረብ ከእግለ ዕመት ለቅድስት እት ፎቃዩ እንዴ ከረዩ ለኮፍዩት ለከህነዮት እት ደምቀቱ ገፍተኣዩ። ክምነ ቁርፊት እት ፈግረ እቱ እዋን እብ ከዋዋት ሳብት ሰበት ትበገሰ ለሽኽሰቱ እብ አማን እብ ጀላል ወሕሽመት ዐቢ ሚርሓይ ደዳነት “አን” ክልብት ዐለት። ለካህን ለሐቅለ ሕሽመቱ ኢትሃወነ እብ። እት ዐተበትለ እስትቅባል እንዴ በዋረ ሽንክትለ ሐሽ ትወለበ ከእግለ ጅኑድለ ቅወት ለእት መባዋርም እት እንቶም እምበል ኩስኩስ ናይ ዘመን ቀዴም ተምሳል እት መሰሎ ልትቃሰው ለዐለው ሻፍግ እት እንቱ እቅምት አበለዮም። ከእዳሁ እንዴ ረፈዐ እበ መፈተይ ክርንቱ ወሰዕንቱ እት ኦሮትመ እንዴ ኢከርዩ ሰላም ቤለዮም።

- ወላጄ፡ ደሐን መጽእኩም አቤኩም ኢልጽኻሐኩም እምበል ለፈቲኩም። ምደብራይ እሊ ኮን ወኪልቃይ ሐይት ላቱ ለመፅዕድ “ረዕ” ልባርከኩም።

ክርን ሰኒ ተኣፈርህ እት በልሰ እቱ ሰምዐ፡-

- ሐምዴ ወሽክር ልብጽሓክ ካህን ረዕ ለመፅዕድ፣

እለ ክርን እለ ዶል ሰምዐ ለገርቡ ክመ እት ዕዮታይ ለክርን ሐየት ሳምዕ ለልትረበበ ለገኖበቱ ኩለ ትረበበት ምኑ። ወለ ዕንታቱ እት አግመኣተን ኣትያት እት እንተን እግል በዐለ ክርን ዐባይ እት ለሐዘዩ እት ምግብለ ቅወት በዋረዩ። ፈርዐን ኖሱ እት ቤቱ ዓይሩ ዲብ እንቱ ክም ረኣ ዐጀብ ወፈርህት ምስል በኣያሁ። ምነ ዋጅቡ ላቱ ሐር ኢሐመጣመ። ሻፍግ እት እንቱ እንዴ ቀርበዩ ዶል ለጀፈርለ ዐረብዮቱ በጽሓተ እንዴ ሰጅደ እሉ እብ ክርን ፍርግት ክምእለ ቤለ፡-



- መንባዩ ፈርዐን ወድ ረቢ ሽኩም። በርህትለ ፋግረት ጸሓይ ወይይባይ ሐያት ወሐለት። መንባዩ ረቢ እት ዐቢ ልብክ ከለዋዩ ወርሰዴዬ ለልትከበት እስትሕማል ልክሬ እትክ እንሻለ። ወዐፎክ ወርዳክ ለሀበኒ፣

ለመልክ ክምእለ ቤለ፡-

- ኣነ እግል በዐል አማን ላቱ ሰኒ መሴምሓይ ኣነ፣

ልብለ ካህን ሀንደገ ወክምእለ ቤለ፡-

- መንባዩ እሊ ሮሻንዬ ሙተዋድዕ ምን ልትዛዩር ሰኒ ዐለ ቀደም በሎ ትፈደሎ። እተው አርሕቡ። ሕደሮ መላእክት ትሕደረኩም።

ፈርዐን ተበሰም ወደ ወምነ ዐረብዮቱ እት ምድር ትከረ። አሚር “ረዕኾፍ” ወለሐዉ ኡመረ ወ “ኾሚኒ” ወ “ኣርቦ” ወ “ሚራቦ” አሰሩ ትካረው። ለካህን ነዳይቱ ሀበዮም ወለ መልክ ወለ ኡመረ ወለ ጸሮም አሰረ ካህን እት ገበኣ እት ቃዕትለ እስትቅባል አተው። ለመልክ እት ምግብለ ጸሩ እንዴ ገብኣ ትጋሰው። ካህን ረዕ እግሎም ለገብእ ዋጅብ ሕራብ እግል ልውዴ እግል ልቅነጽ ሰማሕ ጠልበ ምኖም። ምናተ ፈርዐን ክምእለ ቤለዩ፡-

- ሕነ መሰኣለት ሰኒ ከጢረት ወተእኪር ለኢተኣስተሕምል እምጽእትነ ሰበት ህሌት እሊ ዋጅብለ ሕራብ ዐ-ፋያምኩቱ ህሌ።

ለካህን እንዴ ረክዐ ክምእለ ቤለ፡-
- ከመንባዩ ለቤለዩ ትግበእ፣

ለመልክ እት ምግባዩ እንዴ አግፍሐ ከእበ ቃሎተ ለተኣፈርህ ክርንቱ እግለ ካህን ክምእለ ቤለዩ፡-

- እንተ ኦሮት ምነ ሕሩያም ሰብ ዲን እለ መምለክት ለህለው እንተ። ወእት ረኣሰ እሊመ እብ ዕልም ወለባበት እንተ ትዘይዶም። ከኣልህት እብ ሚ ሰብብቱ እግል ፈርዐናት እት ዐርሽ መሰር ለተኣትገሰዮም እግል ትሽረሕ እግልዬ ሐዜ ህሌት?

ለእናስ እብ ሰባት ወኤማን ክምእለ በልሱ፡-

- ህተ ምነ ውላደ እንዴ ሐሬቶም ለናይ ኣልህት ሩሐ ትነፍሕ ዲቦም እሊ ህዩ ለምድር እግል ለኣሰልሐ ወለ ዕባድ እግል ልለውቆ ምን ሐዜት ቱ፣

- ሰኒ ትቤ። ለገበኣ መሰሪ ጀላብ ርሐ ወዓይለቱ ቱ አሰር እለ እዲነ ተሐት ወለዐል ለልሰዴ። ፈርዐን ላኪን ጀላብ እሎም ክሎም መላዩን ቱ ለለሀርክት ወእት ቀደም ረቢ መሰኣል ምኑም ቱ። ከፈርዐን ጀላብ እሊ ዐርሹ ሚ እግል ልውዴ ወጅቡ ትብል?

- ፈርዐን ጀላብ ዐርሹ እግል ልውደዩ ለወጅቡ ህለ ምን ገብእ እንሳን አሚን ጀላብ እት ሐንቲሁ ለህሌት ኣልህት ለሰለሙቱተ አማነት ለወድዩ እግል ልውዴ ወጅቡ። እብ ዋጅቡ እግል ልቅነጽ ብዲቡ ወሐቁ እግል ለአውፊ እሉ ወክመ እት ሽረፋ ለለሓፍዘ እግል ለሓፍዘ ዲቡ ወጅቡ።

ፈርዐን ራዲ ዲብ እንቱ ረኣሱ እንዴ ነክክ ክምእለ ቤለ፡-

- እንተ ሕሹም ካህን ሰኒ ሌጠ ትቤ ወሰኒ መጽኩ። ኣዜ እግል ተኣሰእኒቱ ሐዜክ ለህሌት ጋር። ፈርዐን እት እሊ ዐርሹ ለልትናዝዑ ዶል ልትረከብ ህዩ ሚ እግል ልውዴ ወጅቡ?

ለካህን ለሓዋር ለልቡ ሰኒ ሀንደገ። ወእብሊ በሊሱ እሊ ርሐ ለሓክም ክም ህለ ሽክ ኢወደ - ምናተ ህቱ ሚርሓይ ዲን ወተቅወት ወክብር ሰበት ቱ - ምነ አማን እግል ለአወልዋ ኢሐዘ ከክምእለ ቤለ፡-

- ጀላቡ ዲብ እሊ ዐርሹ ለመጽኣዩ ላቱ እምበል ረሕመት እግል ለኣብድዩ ወምክራዩ እግል ለአቅዌ ወጅቡ።

ፈርዐን ተበሰም ወደ። ዕንታት አሚር “ረዕኾፍ”መ ረሕመት ለኣለቡ አንጨዋርሐት ለአንጨዋርሐ ዐለዩ። ለምልክ ህዩ ክምእለ ቤለ፡-

- ሰኒ ትቤ። ሰኒ ትቤ። ክምሰልሁ ኢወደ ምን ገብእ ገለድ ረቢ ጠልመ ወለ ኣልህት ለሰለሙቱተ አማነት ኬነ ወሕቁቅለ ዕባድ ኡብደ በህለት ቱ። ሐቆ እለ ልመልክ ለገጹ ትካረብ ወኣድብር ለተኣመክክ ሐር ለኢተኣቀብል ንዩት ትረኡት ዲቡ። ወእብ ክርን ተኣፈጅዕ ክምእለ ቤለ፡-

- እንተ ካህን። ግድም ዲብ እሊ ዐርሹዬ ለልትናዝዓኒ ላቱ ሽፍር ሌጠ ዓይር ህለ፣

ለካህን ረኣሱ አድኻ ወትም ጸብጠቱ። ፈርዐን እንዴ ኣትዐረ ክም እለ ቤለ፡-

- ለአቅዳር ህዩ ክመ እት ዓደተ አስተህዘኣት እብዬ ከለዐዶዬ ጀኔታይ ግርዝ ወዴቱ፣

ለካህን እብ ክርን ድህር ትሰኣለ፡-

- መንባዩ። ጀኔታይ ግርዝ ትቤ?

ለዚደት ምነ ዕንታት ፈርዐን ክም ሰረር እት ትትናፈር ክም እለ እት ልብል ጨጭ ቤለ፡-

- እንተ ካህን ከኣፎ ትቀዋዌክ? ህግደለ አማን ሰኒ ትሩድ ዲብ እት እንተ ጸንሐከ። ወእት ቀደም መንባዘ ሐሰት እት ልብክ እግል ኢትእቱ ገበይ ካልኣ ዐልከ። እንተ እምበል ሽክ ኡብለ ግርዝ ወመዴብያዩ ክም እንተ ቅዌት ደህሌት እግልከ!

ውዳዩ ሰን ክግኤ ምን?

ሰለሰ ነፈር እግል ዎሮት መንደላይ እንዴ ጸብጠው ዲብ ሰይድነ ዑመር በኒ ኣልከጣብ መጸው እቡ። ከእሊ ነፈር ኣቡነ ቃትል ህለ ኣዜ ቅሳስ ንሰእ ምኑ እግልነ ቤለው።

ዑመር በኒ ኣልከጣብ እግለ ነፈር ኣፎ ቀተልካህ? እት ልብል ትሰኣለዩ።

ለእናስ ህዩ፣ “ኣነ እንሰ ወኣግል አውዕል። ዎሮ ገመል እንሳዩ እት ምድር ኣቡሆም ለትትረከብ ዕጩት እለ በልዐ። ኣቡሆም ህዩ እበንት እበ እት መሽከሪቱ ምን ለደደዩ ለገመልዩ ኣባሁ ገሕ ገብኡ። ኣነ ህዩ ለውዲቱ ሰበት ኣትሐረቀተኒ። ለእበንት ለገመልዩ ቀትለት እለ ሀረሰኩ ወእበ እግል ኣቡሆም ዘበዋክዎ፣ ወኣቡሆመ እባሁ ሞተ” ቤለዩ።

ዑመር በኒ ኣልከጣብ ህዩ፣ እለ ምን ገብእ ቅሳስ እግል እንሰእ ምንካቱ ቤለዩ።

ለእናስ ህዩ፣ ከላሰ ምሽክለት ኢኮን ምናተ ቅሩብ ምህለት ሀበኒ። ኣቡዬ ማይት ቱ። እግልዬ ወለ ኑኡሻይ ሐቶ ማል ሐድገ እግልኒ። ኣዜ እንተ ቀተልከኒ ምን ገብእ ለሐቶ ንኡሽ ወለ ማልነ ምስል እት ከደን እግል ልብደውቱ ቤለዩ።

ዑመር ህዩ ከምህለት እግል ሀበክ ምን ደምነክ? ቤለዩ።

ለእናስ ኣግጸትለ ዲቡ ለዐለው ኣዳም እንዴ ኣትቃመተ ዲብ ኣቡ ዘር (ዎሮት ምነ እሙራም ሰሓበት ቱ) እንዴ ኣሸራ እሊ እናስ ደምነኒ ቤለ።

ዑመር እግል ኣቡ ዘር እሊ እናስ ትደመኑ? ቤለዩ።

ኣቡ ዘር ህዩ ሰኒ እደምኑ ቤለ።

ዑመር ለእናስ እንተ ኢተኣምሩ፣ ሐር ሀርበ ምን ገብእ ኣነ ለቅሳስ ምንክ እግል እንሰኡቱ ቤለዩ።

ኣቡ ዘር ህዩ፣ አሚር ኣል ሙእምኒን፣ ኣነ ለእናስ ዳምኑ ህሌኩ ቤለዩ።

ሐቆ እለ ለእናስ ጠለቀው። ወእቅባለቱ እት ልታኸው ካልኣይት ወሳልሳይት ኣምዕል ሰበት ሐልፈዩ፣ ለቅሳስ ዲብ ኣቡ ዘር እግል ኢልትረፍ ሰበት ፈርሀው ለኣዳም ሰኒ ትሻቀለው። ቀዳማይ ሰላት ኣመቅረብ ለእናስ ምን ክትር ሰዐይ እት ለሀልክብ ጠበሽ ቤለዮም። ወእበ ተዐብ ምን ቅያስ ወለዐል ብህዱል እት እንቱ እት ቀደምለ አሚር በዋረ።

ከሐቶ ወለ ማሉ እግል ሓሉታቱ ሰለምክዎ ኣዜ እንተ ሕክምክ ውዴ ቤለዩ።

ዑመር በኒ ኣልኸጣብ እት ልትፈከር፣ እግልሚ ኣቅበልክ ምን ሀራብ ለትመነዐክ ምን ይዐለት ኣፎ እባክ ኢበዴክ ቤለዩ??

ለኣዳም አማነት ትረፈዐት ምኑ እግል ኢልትበህል ፈረህኩ ቤለዩ።

ዑመር ኣዜመ እግል ኣቡ ዘር፣ እንተ እሊ ለእሉ ኢተኣምር ነፈር እብ ሚቱ ለደመንካህ? እት ልብል ትሰኣለዩ።

ለኣዳም ኬር ትረፈዐ ምኑ እግል ኢልትበህል ፈረህኩ ቤለዩ።


ውላድለ እናስ ለማይት ዐለ ህዩ እሊታት ክም ርኣው ወሰምዐው። ህቶመ ርሐም ሰበት ኢወዴት እሎም ለእናስ ሕነ ሱምሓሙ ህሌነ ጠለቁ ሊጊስ እኩም ቤለው።

ዑመር ህዩ፣ ኣፎቱ ሚ ጀሬት ቤለዮም?

ለኣዳም ዐፎ ኣሕድ ትረፈዐ ምኑ እግል ኢልትበህል ፈረህኩ ቤለው።

ተበሰም

• ዎሮት ጋሻይ እት እንቱ ዲብ ዎሮት እናስ ዔረ። ለእናስ ዕዮት እንዴ ሐርደ ወተማም እንዴ ማደዩ እት ቀደሚሁ ከረዩ እሉ። ለጋሻይ ሰኒ ሰፍሩይ ሰበት ዐለ ነተትሕ እት ወድዩ ምን ረኣዩ፣ ለእናስ ህዩ ክምእለ ቤለ፡- “እሊ ናተፎት ለእሉ ትናትፋ ህሌክ ለልርኤ ላቱ። ኣላሁ የዕለም ሐቱ ምዕል እሙ ራድህትክ ለዐለት መሰሉ!” ቤለዩ። ለእናስ ለጋሻይ ህዩ ኣቅመተዩ ኩ- “ኣላቱ! ከእንተ ህዩ ኣፎ ኣክል እሊ ረሐምክ ዲቡ እሙ እዋቢትክ ዐለት ገብእ?!” ቤለዩ።





ነፈሰ ወድ ዕትማን

ሀበይ፡ ግዕድ፡ ሕንጻር፡ ጭንጫይ፡ ገዕ፡ ቀርዕ ወጸየት፡ እሎም ክሎም ኦዳም ዐለው ልትበህል። እሞም ሀይ ምን ነበብት ልብሎ። ወእዝን ነበብ እት ኦዳም አሰክ እለ ሀሌት። ግዕል አሰፈዳይት ዐለ። ወቤት ኦብሁ አሰክ እለ ሀሌት። ጭንጫይ ሀይ ነሰቡ አትተማ ቱ ምርት ዐድ ቱ ገድም ላመ ብዕዳም ኦዳም ዐለው ደኣም ጅንሰም ኢተአመረ። እብሊ ሀይ ሀበት፡ ግዕል፡ ጭንጫይ፡ ገዕ፡ ግሬ ወሕንጽር፡ ቀርዕ ወጸየት ምስል ዐለው ልትበህል። ወሐር ምስል ጸብአው ወእንሰ ናይ ነቢ ረክበው። ለእንሰ ክምስል ረክበው ምን አርበል ለትትበህል ነኣት ሰርቀው። ወእንዶ ጌሰው እበ ሐርደው። ሀበይ በለማት ቀየሕ ዕንዱቅ ዐለ። ወሕንጽር ሀይ ቤትለ ሱተል ለእቡ ጠቤሕ ዕንዱቅ ዐለ ወምስል እንዴ ገብአው እግለ

ዓዳትን ነጽፎር

ነፈሰ ወድ ዕትማን ወኢኖ ሊትማን እብ ክሰብ ሐልየት፡ ዓዳት ወአድጋም ትግራይት እተ ወደዉ በሐሰ ወድራሳት፡ ክምስልሁመ እት ደረጀት ሞባዕት ለአብጸሐው፡ ከዮም ክብት ትግራይት እግል አጅያል ለሐዲስ ጋብእ ለህለ አክትብት፡ እግል መትሃማየት ትግራይት ዝሕረት ዐባይ ቱ። ነፈሰ ወድ ዕትማን ወኢኖ ሊትማን ሀይ ዲብ ተእሪክ፡ ዓዳትን ወሕላይን ለአግደዉ ዶር እብ ቀሊል ለልትረኡ ኢኮን። ከሰፍሐት ፈን ወግዳት እለ እት አክትብት በዲር ለህለ ርዝቅ ህግያን ክሉ ኦዳም ጀላብ እግል ልርከቡ፡ ለኣምሩ ወልትነፈሶ እቡ፡ እትሊ ዓሙድ እለ ምን ብዞሕ ጽባባለ አክትብት ዲብ ነሐራ እንቀድም እኩም ሀሌ። ከእግል ዮም'መ ምን እለ አክትብት እለ ለአዳሌናሁ ጽባባ ጀበእ እምለኩም፡ ክቅራኣት በኪተት፡

ድግም ምሕራድ አርበል

ነኣት ጠቢሐ ዐለው። ግዕል ከረ ከርሸት ወሸንፍለ ወአምዲት ለትክዕስ ዐለ። ጭንጫይ ረኣሱ ሽብሕ ለሐሰስ ዐለ። ገዕ ሀይ ዲብ ኣካን ውቅል ሻባይ ዋድያሙ ዐለው። እግል ቀርዕ ሀይ እብ ሐርብ ማይ አውረደው። ጸየት ሀይ ለእሉ ነስአው ሰገ ተአበሸል ዐለት። ለቴለል ክእነ ዲብ እንቱ ሐር ራድኢትለ ነኣት ነቢ ሰገ ተአበሸል ዐለት። ለራድኢት ዲብ ተትኣስር መጽኢት፡ ወእግለ ሰገ ዲቡ ሐድገው። ወነቢ እብ ከራዊሁ ረግመዮም። ወእብለ መርገም እለ ምን ኦዳም ዲብ ሔዋን ከደን ትበደለው። ሀበይ ለበለማት ለእለ ዕንዱቅ ዐለ ለዋኣት እቱ። አዜ ለቀየሕ ዲብ አንገብ ሀበይ ለትትረኡ ህታተ። ግዕል ክምስለ ክሉ ለኣምሩ ዲመ ዲብ ክል ኣካን ዲብ ለትክዕስ ልትረኡ። እብሊቱ ሀይ ዲብ ኣካን ከዕስ ወሐርዕት ለጸኔሕ። ሕንጽር

ሀይ እብ ዕንዱቅት ቤትለ ሶግል ለዲጽቱ ዲመ እግል ትትነተፍ ለሐዜት ዲብ መስል ቅንቅንት ትትረኡ። ጭንጫይ ሀይ ዲመ ዲብ ልትኣስስ ጸኔሕ ወእብሊቱ ዲመ ረኣሱ ዲብ ደክክ ለእንርእየ። ገዕ እት ኣካን ውቅል ሻባይ ክምስለ ጸንሐየ አዜመ ክል እዋን ረኣሰ እበን ጸንሕ ወረኣሱ ረፊ። ቀሬዕ ለማይ ጋይሰት እት እንተ ክምስጸኣተ ወራታት ወመንበርህ ክል ዶል እት ማይ ገኣት። ጸየት ለመብሸላይት እት ዕጩት ትበደለት። ወጸየት ክሉ ቀርቅዶ ገኣት። ወእብለ መርገም ትብደለው ወነቢ ከራዊሁ እግል ሰገ ለነኣትመ እብን ግበእ። ቤለወ ወእብን ግበእ ቤለው ወእግለ ነኣት ለትመሰል እብን ገኣ ወኣስክ እለ ዮም ሀሌት። ለእብን ወለ ኣካን ክለ ትረገመት። ወኣስክ አዜ ሰዐር ሐቱመ ኢበቅል እተ። ወሰምለ ኣካን ምሕራድ አርበል ትበህለት።

ወተር መሰንቆ

መሰንቆ ለእቡ ዘቡጠ አወትር ቤ። ወክል ወተር ሰም ቡ። ወክም ትዘበጠት ወተር እገሌቱ እለ ልብሎ ከለአሌልም። ናይ ገህይመ ወተር ቤ። ወናይ ህጅክመ እተ ክምስልህ። ወእት ለመሰንቆ ክል ገቢለት ወተረ ተኣምር። ወህቱ ትዘበጠ ምንገብእ ክል ምርት እት ለናዩ ለአሰቅር።

አስማይለ አወትር እለንተን፡ ሰብብ ናይ ነታብ፡ ሚን ዓምር፡ መንደር ወተሌስ። ብልሽ ናይ ዐድ ትማርያም ቱ። ቤጽዓይ ናይ ክሉ ሐሊብ እንሰ ለሰቱቱ። ወክል እናሰ እት ለወተሩ ልግበእ መ አክል ለአሰቅረ ለእበ ለአሰቅር ቡ። ደኣም ሚንዓምር (ቢን ዓምር) ወሐባብ ወዐድ ተክሌስ ወዐድ ናይብ እሎም ለዘይድ “ፋርስ!” እንዶ ቤለው ለአሰቅር። ወክሉመ ፈዳብ ወሓዋር ለገብእ ፋርስ እት ልብል ለአሰቅር።

ኤርትራዩን ሰካን ቀጠር፡ ሰዑድዩ ወመሰር፡ 8 ማርስ እብ ሐበን ትዘክረወ



ኤርትራዩን ሰካን አደውሓ - ቀጠር፡ ጀዳ - ሰዑድዩ ወካይሮ - መሰር፡ 8 ማርች - እድንያይት አምዕል አዋልድ አንሳት እብ ሐበን ዘክረወ። እት ዮም 10 ማርች ዲብ አ'ደውሓ ለህለ መርከዝ ዓዳት ኤረትርዩ እትለ ገብእ፡ እብ ፈሬዕ መሕበር ወጠን አዋልድ አንሳት ኤረትርዩ ለትዝመ ዒድ፡ ሰፊር ኤረትርዩ ዲብ ቀጠር - አሰይድ ዐሊ እብራሂም፡ አትያመ ለህሌነ መርሐለት፡ እግል 8 ማርስ ዝያድ ነያረት ለተህይብ ክምተ ሐቀለ ሐበሪ፡ ኤርትርያይት ወለት አንሳይት እት መደት ንዓል እግል ሕርየት “መሳዋት እብ መሻረከት ሕበር” እብለ ትብል ደማንት ሳብተት እብ ፍዕል ለአከደቱ ውቅል መሻረከተ፡ እትለ ሐልፈ 30 ሰነት ዝያድ ዲብ

ልትአከድ ክም መጽእ ሸርሐ። መሰኡለት ፈሬዕ መሕበር ወጠን ሸባብ ወደረሰ ኤረትርዩ አሰይደ ግደ ምሕረትኣብ እብ ጀህተ፡ ኤረትርያይት እብ እስትሸህደ ለአከደቱ ሕቁቱ፡ እግል ጂል ሐዲስ ሰዋልፍ እብ አውረሶት ወኣብነት ርሒብ እንዴ ትክለቀ ዝያድ እግል ተሐዋጡ ክም ወጅብ ወድሐት። ለዒድ፡ እብ ዓዳት ወፈን ናይር ዐለ። ኤረትርዩን ሰካን ጀዳ - ሰዑድዩ እት ዮም 9 ማርስ ለወደዉ እለ ለትመሰል ሐፍለት፡ ደረሰ እድንያይት መድረሰት ኤረትኤርትርዩን አዋልድ አንሳት ለለአርኤ ወበራምጅ ለተለ ዐለ። መሰኡለት ፈሬዕ መሕበር ወጠን አዋልድ አንሳት ኤረትርዩ አሰይደ ኑረ

ሓጅ ዐሊ እትለ አስመዐተ ከሊመት፡ 8 ማርስ 2023 ዲብ ፍንቱይ ወምህም ተእሪካይ ምዕራፍ ትትዐየድ ክም ሀሌት ሐቀለ ሸርሐት፡ እትለ እግል ልትበጸሕ ለገብእ ንዓል ወለትደፍዐ እስትሸህድ ፈቂድ ወዲብ ለሐሰት መርሐለት እግል ልትበጸሕ ዝያድ ክድመት ክም ለኣትሐዜ ወድሐት። እለ ክእነ ዲብ እንቱ፡ ዲብ ካይሮ ለትዝመ በርናምጅ፡ ሰፊር ኤርትርዩ ዲብ መሰር አሰይድ ፋሲል ገብረሰላሴ፡ ዶር ውቅል ኤርትርዩን አዋልድ አንሳት ዲብ ኩሉ መራሕል ወመጃላት ለትሸፊሕ ከሊመት ሐምዴ አስመዐ። መሰኡለት ፈሬዕ መሕበር ወጠን አዋልድ አንሳት ኤርትርዩ ዲብ መሰር አሰይደ ከልቱም አደም ሀይ፡ ከሊመት መሕበር ወጠን አዋልድ አንሳት ኤርትርዩ ቀደመት። እለ ክእነ ዲብ እንቱ 8 ማርስ - እድንያይት አምዕል አዋልድ አንሳት፡ ዲብ ሶዳን ወኣቶብዩ - “ኤረትርያይት ትጋብህ ወተኣደሚዕ፡ ትሸቁ ወተኣለሚዕ”፡ እት ሐንቴለ ትብል ሰቅራት፡ ፍርሰት ወዶር ኤረትርያት አዋልድ አንሳት ለሸፊሕ ዕፌ እብ ነያረት ትዘክረት። ኤርትርዩን ሰካን ሰዳን - ሽርቱም እትለ ዝመወ መናሰብት፡ ሰፊር ዒሰ አሕመድ ዒሰ እተ ቀደመየ ልእከት፡ አከደት መሳዋት ኣብነት እግል ኩሉ መዋጥን እብ ፍንቱይ ሀይ አከደት ሕቁቅ ወመሳዋት ናይለ ሰር ናይ

መጅተመዕ ላተን አንሳት፡ ምን አግደ አህዳፍ ሕኩመት ኤረትርዩ ክምቱ እት ሸፊሕ፡ ለልሰርገል በራምጅ እንዴ ትረተብ ሰኒ ክም ትሸቀ ወፍገሪቱ እብ ቀላል ለትትርኤ ክም ኢኮን አፍሀመ። ዲብ መሕበር ምስንዮት ኤረትርዩ ወሰዳን መሰኡለት ሸኡን አዋልድ አሰሳት አሰይደ ሻይዘ ዐባት እተ አስመዐተ ከሊመት ተእዩድ፡ ኤረትርያት አንሳት ዲብ አከደት ሕቁቅን ወሕርየት ወጠን ለወደያሁ ዶር ለባቱ መትዐጃብ ዲብ ተኣክድ፡ “አሰናይክን” ትቤ። ለበርናምጅ፡ ፍርቀት ዓዳት ዋርስ እብለ ቀደመቱ ዕፌ ናይር ዐለ። እምበል እለመ፡ ሰፊር ኤርትርዩ ዲብ ኣቶብዩ፡ ሳብት ልኡክ ዲብ እተሓድ አፍሪቀ ወመፈውድ እቅትሳድ አፍሪቀ ለዝመየ እለ ለሽብህ በርናምጅ፡ መዕነት 8 ማርስ እግል ኤረትርያት ዮም ዓመት ፍንቱት ለወድየ ጋር ወለዒድ እበ ከሰስ ሸፊሕ አስመዐ። እብ ተውሳክ፡ ሰባተት ወመትሰባል፡ ወቀድ፡ ውሕደት መሕበራይ ውፋቅ ወመሳዋት ለዕላመቱ ሰዋልፍን ዲብ አጅያል-ሐዲስ እግል ልትዐዴ ለገብእ ጸገም እብ ለትደቀበ እግል ለአተላሌ፡ ሐዞት ክል-መዋጥን ክም ተኣትሐዜ ተሐበረ። ለዒድ፡ ሕሸመት፡ ወቀይ ወንዳል አንሳይት ኤረትርዩ እብለ ለአርኤ በራምጅ ናይር ዐለ።



ኢኖ ሊትማን

ሕላይ

ቀዳም ያም


ዲብለ እት ሰነት 1913 ለትኩተበ ክታብ ሐይለት ትግራይት ብዞሕ ሐይለት ሀሌ። ከዮም ጀሪደት ኤረትርዩ ሐዳስ ምን ሐልየት ዳምር ወድ ግብግን እግል ትትናወልቱ። ዳምር ወድ ግብግን ላሊ ዲብ ሰክብ እብ ሕልም ሐወ ወናር ወድ ብእምነት እብ ግድሪ ለሞተው ረኣ። ወክም ፈዝዐ እለ ሕላየት ምን ረኣሱ ተልተሉ፡

ሚ ሕልም ረክበኒ - ሰብ ተሐት ወሰብ ለዐል ለኣትጋሴ ህቶም ጎይ ኢመጽኦ - ወኣነ ዐልኮ እትላኬ ኖር ርኣነ ወድ ብእምነት - ሹም ለሸየም ፈራዴ በዩእ እት ድጌ - ከልካሊታት ልትቃሴ።

እድሁ ለእስሮ ኢትኣቤ - ፈጋር እምበል ሕማሴ ሚስ ሓድግቱ ወማሰ - ጽኔዕ ሓድግቱ ወሕንቃቄ አፍሓሬን ባልሰ - ሰባሰባ ፋዴ ቡሳዩ ለፍልፍ - ደብናሁ ትዘራኬ ዐድ-ከንቴባይ ሰብት - ሸኪክ ወድዋር ልትዋዴ።

ሰብኡ አድሕድ ደራማ - አሩይ ምን ሕድ ልትኣቱ ዐብደል ግሳስ ሰልመ - ለጅንግላይት ትትካቱ ባርያይ ቢሻ ልጸዐነ - ለሻፍግ እግል ዘማቱ ላንኪት ዘንብ ጅንግላይ ተ - ጋድላይተ ተኣትሓሴ ሰራዥ ክል ሕዋር - ምን ክል ሕዋር ትትቃዴ አፎ ሰካብ በዴኒ ሸለምተ - አምበል ህርጋቱ አናመ ህግዩ እት አምርቱ - እት ገርብዬ አትባዴ።





ወጠንያይ ጅግራታት ሰዐይ (ትራክ) ምተሐት 18 ሰነት ተመ



ዲብ አቅሊም ግብለት መዲነት ዐዲ-ቀይሕ ገብእ ለአስመን ጅግራታት አትሌቲክስ ሰዐይ-ትራክ ምተሐት 18 ሰነት፡ ክምሰልሁመ ዐባዩ አትሌታት ለሻርከው ዲቡ ናይ 10 ኪሎምትር ሰዐይ ጽርግዩ፡ ለሐልፈተነ ሰንበት ዐባይ ተመ።

እሊ ጅግራታት ጅምዐት ወሰንበት ንኢሽ ናይ ትራክ ትልህሆሁ እንዴ ወደ፡ ጅምዐት ናይ 100፡400፡ ወ1500 ምትር ሰዐይ ገብኡ። ሰንበት-ንኢሽ ህይ፡ እት 200፡ 800 ወ 3000 ምትር፡ 4ኡብ1000 ምትር ሰዐይ መትከባባት እብ ክልኢቲ ጅንሰ ጋብእ ዐለ።

እብሊ ህይ፡ እት ናይ 200 አዋልድ፡ ሶልያና ገብራሂውት-ምግብ፡ ሉልያ በረኽት -ግብለት፡ ወናኦሚ ዮናስ -ምግብ ተወተዮ። ምን ውላድ ህይ፡ ሴም ምሉኒታ-ደንደን፡ ዮሀንስ ክፍሌማርያም-ምግብ፡ ሄናክ ተሰፋይ ዐንሰባ ቶም።

መዳልያት ደሀም፡ ወርቅ ወአስራዲ ህይ ነሰአው።

እት 800 ምትር አልማዝ ክፍሎም -ግብለት፡ ፋዋማ አሕመድ-ምግብ፡ ወልደታ ኤፍሬም-ምግብ ልትወወት ዲብ ህለዩ፡ ምን ውላድ ሄናክ ሀብቶም ወያፌት ምሰግና-ምግብ፡ ዳዊት ሀብቲ -ደንደን ሰለሰ ለሰልፋያም አተው ቶም።

ለናይ 3000 ምትር ጅግራታት ፍንቱይ ዐለ፡ አቅሊም ምግብ እብ ክልኢቲ ጅንሰ ለትዳለ መዳልያት ጃቀፈ። ምን ምግብ እዮቤል ዘርኢት፡ እሰይ ሀብቶም፡ አማኑኤል በርሄ፡ ክምሰልሁመ ሮዝ ሳሌ፡ ማርያ ዐሊ ወድያና ሺሻይ ተወወተው ወተወተዩ። አቅሊም ምግብ፡ እት ሰዐይ 1,500 ምትርመ፡ እሊ ለመሰል ለበዝሐ ዐውቲ ረክበ።

ለበዜሕ አዳም ልታከዩ ለዐለ ጅግራ ሰዐይ መትከባባት 4ኡብ100 ምትር ተ፡ ለሰልፋይ መትጃግራት

100 ምትር፡ ካልኣይ ለትከበተዩ 200 ምትር፡ ሳልሳይ 300 ምትር ወራብዓይ ለልትከበቱ 400 ምትር ጅንሰ ሰዐይ ሰበት ዐላቱ ለፍንቲቱ። አቅሊም ምግብ ህይ እብ ክልኢቲ ጅንሰ ዐቲታቱ ዲብ ለአክልል፡ ፍረቅ ደንደን ወዐንሰባ እብ አዋልድ፡ ግብለት ወደንደን ህይ እብ ውላድ ደርብ አቅሊም ምግብ አተው።

እብ ዓመት እትሊ ጅግራ ሰዐይ፡ አቅሊም ምግብ 10 መዳልያት ደሀብ፡ 10 ወርቅ ወ7 ነሐስ እብ ዓመት 27 መዳልያት ንሰእ እት ሀሊ፡ እብ ክልኢቲ ጅንሰ ሀረመ አው ሻምፕዮን ነሰአ። ፈሪቅ ደንደን ሰለሰ ደሀብ፡ ክልኢ ብሩር ወክልኤ ነሐስ እብ ዓመት ሰቦ መዳልያት፡ ግብለት ሐቲ መዳልያት ደሀብ፡ ክልኢ ወርቅ ወክልኤ ነሐስ እብ ዓመት ሐምስ መዳልያት፡ ዐንሰበ ህይ እብ ሰለሰ ነሐስ ዕውታም ህለው።

እምበል እሊመ፡ ናይ 10 ኪሎምትር ሰዐይ ጸርግዩ ክፋል ናይለ በርናምጅ ዐለ። እሰልፍ አዋልድ እት ልሰዕዩ፡ እግለ እት ሐምስ ዱረት ለትነዘመ ሪም መሳፈት አትሌት ፈሪቅ ደንደን ናይ ውዛረት ድፊዕ ፍዮሪ ገብራሂውት እብ 35ደቂቀት፡ 35 ካልኢት ወሰስ ክልኢት-ንኢሽ ተወወተት ዲቡ። ንጽሃ ንጉሴ -ደንደን፡ ሮዝ ሀብቲሰላሴ-ግብለት፡ መዚት ተሰፋይ -ደንደን፡ አርያም ዘርኢይ ወመርሃዊት ወልዳይ ህይ አስክ ሳድሰ ተርቲብ ለጸብጠዩ ዐለዩ።

ምና ፈዳብያም አትሌታት ተብዕን ህይ፡ አቅሊም ዐንሰበ ለወክለ ዎርት አትሌት ዐብደልረዛቅ ሱሌማን ሰልፋይ ፈግረ። እሊ አትሌት እግለ መሳፈት እብ 30 ደቂቀት፡ 34 ካልኢት ወሐቲ ንኢሽ ካልኢት ሰልፍ ከዋ ዲብ ከይድ፡ ብርሃኔ ነጋሲ-ምግብ፡ ሚክኤል ሰዩም ወአፍወርቂ ብርሃኔ -ግብለት፡ ናሆም ኤርምያስ እብ ብሕቶት፡ መርሃዊ መብረህቲ -ደንደን ህይ ደርቡ አተው።

እት ናይ 10 ኪሎምትር ጅግራ፡ ምን አወላይ አስክ ሳድሰ

ልብእቶም አትሌታት ሰዐይ ለትረአው ዲቡ ዐለ። እሎም መቅደረት ሰኔት ክም ቦም እርኡያም ለህለው ሸባብ፡ መበድለት ናይለ እት ለትፈናተ ጅግራታት ካርጅ ሰሚቶም ወሰሚት ወጠኖም ለአሰሙ ለህለው አትሌታት እግል ልግብኦ ሰእየት ህሉት።

እት ምንተሐት 18 ሰነት ለዓማርያም ዲብ ትራክ ለሰዐው መትጃግረት ገሌ ሸክዋት ናይ ዕቢና-ዕምር ለአሻረከው ፍረቅ ሰበት መጽኢ፡ ለዱሉይ እሎም ለዐለ ጀዋእዝ ክምሰል ኢነሰአው




ለአተው መትባድረት፡ 15 አልፍ፡ 10 አልፍ፡ ሰቦ አልፍ፡ ሰስ አልፍ፡ ሐምስ አልፍ፡ ወሰለስ አልፍ ነቅፈ ጃእዘት ነሰአው። አወላይ ለአተ ዐብደልረዛቅ ካስ ወመዳልያት ደሀብ ክም ፍንቲት ጃእዘት ትወሰኩ። እሊ ጅግራ ብዝሓም ሰእየት

ተአመረ። እሊ ሳኪን እግል ልግበእ ለይዐለ እሉ፡ ልጅነት ምን ሰልፎም ዲብ ጅግራ እንዴ ኢመጽኦ ሸሃዳት ሚላዶም እግል ተአትጻፊ ወጀብ ዐለ ድኢኩ፡ ጅግራ ክም ገብኦ ምን ገጽ ሐር፡ “ጀዋእዝ ኢነህይብ” እግል ቲበል ለልክሸንን ጋር ኢትን።

ፕሪመርሊግ እት 27ይት ሳምንቱ

እት ሐልፈ ሰነብት ወጅምዐት በህለት ምን ዮም 10 አስክ 12 ማርስ ለድቁብ ፍረቅ እንግሊዝ -ፕሪመርሊግ ትልህያታቱ ዋዲ ዐለ። እትሊ ትልህያታት፡ እት ሐልፈት ሳምን ረአሱ ራፌዕ ለዐለ ፈሪቅ ሊቨርፑል እብ ንኢሽ ፈሪቅ ቦርኔማውዝ 1-0 ለትቀለበ ዲብ ሳምን ሰበት ዐለት፡ ገሌ ፍረቅ ገጽ ተሐት እት ለሀገን ገሌመ ንቀጡ ወቀለ።

እብ አሳስለ ትረከበት ፍገሪት፡ ቦርኔማውዝ እግል ሊቨርፑል 1-0፡ ኤቨርቶን እግል ሊድስ-ዩናይትድ 1-0፡ ቶተንሃም እግል ኖቲንግሃም ፎሬስት 3-1፡ አርሰናል እግል ፋልሃም 3-0፡ ቼልሲ እግል



ኒውካስል እግል ዎልቨስ (2-1)

ሌሴስተር ሲቲ 3-1፡ ኒውካስል እግል ዎልቨስ 2-1 ወማንቼስተር ሲቲ እግል ክሪስታል ፓላስ 1-0 እት ቀለቦም፡ ዌስትሃም

ወአስቶንሺላ 1-1፡ ማንቼስተር ዩናይትድ ወሳውዛምፕቶን 0-0፡ ሊድስ ውብራይቶን ህይ 2-2 ትፈናተው።

እብሊ ህይ እት ሰብረት ፕሪመርሊግ ለዐስር ሰልፋያም ፍረቅ እሎም ተሉ ቶም፡

ፈሪቅ ንቀጡ

1. አርሰናል = 66 ንቅጠት
2. ማንሲቲ = 61 ንቅጠት
3. ማንቹስተር ዩናይትድ = 50 ንቅጠት
4. ቶተንሃም = 48 ንቅጠት
5. ኒውካስል = 44 ንቅጠት
6. ሊቨርፑል = 42 ንቅጠት
7. ብራይቶን = 42 ንቅጠት
8. ፋልሃም = 39 ንቅጠት
9. ብራንትፎርድ = 38 ንቅጠት
10. ቼልሲ = 37 ንቅጠት



ቦርንግውዝ እግል ሊቨርፑል (1-0)

ሴራ-አ ኢጣልያ

ፍረቅ ሴራ-አ ኢጣልያ ለሐልፈት ሳምን 26ይ ደውረሁ ዋዲ ዐለ። እትሊ ናይ ዮም ዓመት ደውሪ ዋልያን ፈሪቅ ናፖሊ ረአሱ ራፌዕ ለህለ መስል። አስክ እሊ 68 ንቅጠት ወደርቡ ለህለ ኢንተር ሚላን 50 ንቅጠት ቦም - ፈርግ 18 ንቅጠት በህለት ቱ።

እትሊ ሳምን ለተልሀው ህይ፡ ሰፔዝዩ እግል ኢንተር 2-1፡ ኡዲኔዝ እግል ኢምፖሊ 1-0፡ ናፖሊ እግል አተላንታ 2-0፡ ቶሪኖ እግል ሌጅ 2-0፡ ፍዮረንቲኒ እግል ክሪግኔዝ 2-0፡ ሮማ እግል ሳሶሎ 4-3፡ ጅቭንቲስ እግል ሳምፕዶርያ 4-2 እት ቀለቡ፡ ሚላን ወሳሊርኒታና 1-1፡ ቪሮና ወሞንዝ 1-1፡ ወሳዝዮ ወቦሎኛ ህይ 0-0 ፈግረው።

ምን ፍረቅ ሴራ-አ ለ5 ሰልፋያም፡

- | | | |
|---------|-------|---------|
| 1. ናፖሊ | ----- | 68 ንቅጠት |
| 2. ኢንተር | ----- | 50 ንቅጠት |
| 3. ሳዝዮ | ----- | 49 ንቅጠት |
| 4. ሚላን | ----- | 48 ንቅጠት |
| 5. ሮማ | ----- | 47 ንቅጠት |



ኢበ ሰበት መዳነት ስኬክሳፕደሮ



መዳነት አሌክሳንደርያ እብላ ትመልኩ ርሕብ ወተጠውር፡ ዲብ ምስር ሐቕ መዳነት አልቃህረ ዲብ ካልኣት ደረጀት ትትረተብ፡ እት ሰነት 232 ቀደም ተውሊደት ነበእ ዒሰ እበ እተ ወክድ ለሀይ ብዙሕ ሸህረት ወቅወት ወዲ ለዐለ ወእግል ለበዝሐ ምግባይ ምፍጋር ጸሓይ እስትዕመር ለዐለ አሌክሳንደር ዐቢ ሐቕ መትጸባጠ፡ እግል እሕትራም ናይለ መልክ ‘አሌክሳንደርያ’ እንዴ ትበህለት እግል ትሰሚ ክም አንበተት ሰጅል ታሪክ ለአመርዴ።

እት ቀዲመት ምስር ክም ሚነት ወምግብ ትጃረት፡ እብ ናይ ደያነት ወዓዳት ለትትአመር ለዐለት መዳነት አሌክሳንደርያ፡ ምር ምነ ዲብ እለ እነበረ ለህሌነ እዲነ ምን ሰቡዕ ዐጃይቦታት ብነ ዐለምነ ላቱ ‘ብላይት ሃውስ’ ለልትአመር ክም ልትረከብ ዲበ ልትአመር። እለ ዲብ 284 ቀደም ተውሊደት ነበዩህህ ዒሰ ለተመ፡ እግል ብንጽቱ መደት አርበዐ ሰነት ለነስአ መብነ፡ ዲብ መደት ሕክም ቶሎሚ ክም ትብነ ልትሀደግ።

እለ መብነ እለ እተ ወክድ ለሀይ እበ ዐለ መሸሁር ረሳም ሶቅራጦስ

The Lighthouse at Alexandria


Nearly all the Greeks agreed that the Lighthouse should be included as one of the wonders of the world.

It was built around 300 BCE on the Island of Pharos in the harbor of Alexandria, Egypt.



ለትህንደስ እትገብእ ዲብ እንክሩ ተሓት ርክን መረበዕ ሸክል፡ ዲብ ምግብ ሰማን ሸክል ለቡ አርካን ወእት ለዓል እንክሩ ህይ ክቡብ ሸክል ለዐለ እሉቱ። ለመብነ ብዙሕ ተሕሊል ለልትሀየቡ ምንግቱ ምስለ ናይለ ወክድ ለሀይ ሸዑብ፡ ናይ ደያነት መትጸባጠ ክም ዐለ እሉ ልትአመር። እለ ዲብ መዳነት አሌክሳንደርያ ለዐለ ለልትዕጅብ መብነ እግል ሐድ 1500 ሰነት ለጸንሐ እትገብእ ሐር እበ ሳደፈ አንቀጥቀጢን ክም ደመረ ልትሀደግ።

10 ፍንቲት ሕዘው




ጀዛይር ፎክላንድ




ጀዛይር ፎክላንድ ዲብ ግብረታይ ክፋል ምሒዋ አትላንቲክ ለልትረከብ እብ ዐደድ ብዝሓት ላተን ጀዛይር ተን። ናይ ሐድ 12,200 ኪሎ መትር መረባዕ ርሕብነ ለከምክመ እብ ክልኡ ዐባዩ ውበዕዳት እብ አምኡት ለልትዐለበ ጀዛይር ለትአሰሰየ ጀዛይር ፎክላንድ ለበዝሓው ብርግንዩን ላቶም ሰካን ልትረከቦ ዲበን። ለክልኡ ዐባዩ ጀዛይር ምፍጋር ጸሓይ ጀዘረት ፎክላንድ ከምስልሁመ ምውዳቅ ጸሓይ ጀዘረት ፎክላንድ ልትበህለ።

ርሕብነ ናይ ምፍጋር ጸሓይ ጀዘረት ፎክላንድ 6,610 ኪሎ መትር መረበዕ በጽሕ እትህለ፡ ምውዳቅ ጸሓይ ጀዘረት ፎክላንድ ህይ 4,530 ኪሎ መትር መረበዕ በጽሕ። ለተርፈ ርሕብነ ናይለ ጀዘረት ህይ ዝያድ 200 ለገብእ ጀዛይር ለከምክምቱ።

ጀዛይር ፎክላንድ ለህለ እለን ሓለት ጀው፡ እበ ምስል ቃረት አንተርክቲክ ጀዛይር ለልትሓደድ ግብረታይ ክፋል፡ ዲብ ሐን ሐጋይ እብ ተቅዩም ሐፋነት እብ ፍንቱይ ወሬሕ ጃንዋሪ 13 ዲግሪ ሰንት ግሬድ በጽሕ እትህለ፡ ዲብ ሐን ከረም ህይ ምን ተሐት 4 ዲግሪ



ሳድስ ወራር እብ ካርቱን



እስከ ታመት መፅናውታ ወ ምራቂ 39ባ ለፍዋርም ሓፋም መፍቲላን፡ ጀት 10 ክቲላት ለጠ ልትክምክም ሰለውን ምን ጸለን ቅዋት እለን ለትፍገሪ ወሐሕ 3 ካታባብ (ክቲላት 38፡ ክቲላት 74 ወ ክቲላት 75) ክም ተእታታ፡ እት ሕሓር ጸሐይ ሰላሳ፡ እት ቅድረት 74ባ፡ ብክፍሪ ጸሐይ ጸክቲ ጀጣላት ክም ለገቲ ገሕ፡ ልብን መፍቲላን ለካገ ምን 13 ገልፍ ጸሐይ፡ ሕፃን ለጸክሕት እት ፍፁዋ ሓለቱ ለልዩር መገፃፃ፡ ጸሐይ ጸት፡ እለ ካከት እለ ምንክገገ እት ቀደግሆም ለገገ ወራር ጀግባ ልግነት እግ ለተቀደረፍ ምስጢር፡